


甌香館集

補遺詩補遺畫跋  
附錄

一





甌香館集

通遺詩補遺跋附錄

(一)

暉格著

# 原序

世有獨至之人。而後有獨至之詩。夫得于天者爲性情。出于身者爲行誼。存之爲學識。發之爲文章。性情不真。行誼未篤。而學識未正。徒欲以詩文誇詡天下。天下其許我乎哉。吾友憚叔子。少遭多難。其所閱歷。艱危奇變。而卒完我天倫。克返初服。尊君遜庵先生。以積學礪行。爲世師表。叔子終身隨侍。視聽嚴慎。不知戶外已更漢魏也。故以叔子之才華。而卒無以自見。周旋定省之暇。以其所得。發爲詩歌。出入騷雅。上下三唐。大都匠心創別之作。不傍籬落。不拾餽釘。吐納六合。俯仰今昔。渾雄雋拔。而沉痛。三閭之憂憤乎。柴桑之感歎乎。杜陵之悲怨乎。余嘗取而讀之。撫卷歎曰。此真叔子獨至之詩。而非隨聲附響。自棄性情。強爲嘲笑者矣。夫鸚鵡之言。獼猴之舞。人無不欣然聽視。而求其改色動容。欲泣欲歌。不能也。何也。以其形似僅存。神理不屬也。詩之爲道亦然。不本之性情。卽規撫晉魏。彷彿唐人。欲以欺世眩俗。而卒不可得。乃讀叔子詩。忽焉使人淒其流涕。忽焉使人怒髮上指。正如易水一歌。商徵乍更。喜怒頓異者。聽者之性情。不覺移于歌者之性情也。叔子旣歷喪亂。少壯時多與畸人俠士遊。常奔走千里。恍惚死生。他人色沮神喪。而叔子意氣如常。故其詩中多豪宕感激之什。至于剖析理命。研極淵微。篇中尤多精闢之語。非深山學道人。未易知其所際也。蓋性情真。行誼篤。學識醇。不愧其家傳。故其詩遂至于此也。叔子少棄舉子

業無所事。又傷其家之貧。無以致甘旨于其親也。閒繪山水以給旦夕。識者爭欲致之。一幀可易數十緡。既而見虞山王子石谷所畫山水。遂改爲卉草禽魚。神巧幾奪造化。蓋無不出于獨至之心胸也。叔子言貌恂恂。與人接。恆簡靜不發一語。卽習與遊者。亦不盡知其工于詩。乃若此也。夫叔子且不欲以詩名。豈欲以畫名哉。不知叔子之詩。而至欲求叔子于畫。是叔子所遇之窮也夫。丙寅秋日。宛谿顧祖禹拜撰。

# 序

毘陵惲氏世家也。會國難起。而南田與父遁跡沙門。養晦久之。自號抱齋客。若忘機者流。無意於世者。嘗語所親曰。昔阮孝緒作高隱傳。以姓名不欲人知者爲第一倫。及其學成望重。而名人獻老。稱之不置。雖至雞林賈。莫不知有南田者焉。今蔣君生沐。重刊其遺集入叢書。以廣其傳。此范史表抱微爲逸民傳之遺意。誠爲吾黨盛事。余耄矣。慶幸無已。贊曰。

古之遺高。煜於毘陵。三辰降秀。手揮五雲。九淵皆映。千菴齊芬。鶴峙霄遠。抗首風塵。朱絃漢曲。茲遇賞音。玉明文苑。四照花春。

道光戊戌夏五。吳郡陸鼎。書於梅葉閣。時年八十有三。

# 南田先生家傳一

惲敬大雲山房集

先生諱格。字壽平。後以字行。改字正叔。少居城東。號東園草衣生。遷白雲渡。號白雲外史。既老。號南田老人。先生年十三。隨父遜庵先生。依王祈于建寧。陳錦破建寧。被略。錦無子。其妻子之。後從錦遊杭之靈隱寺。遇遜庵于塗。遜庵因與寺主諦暉謀。俟錦妻入寺。給言此子宜出家。不然且死。錦妻留之寺中。泣而去。先生始得歸。先生以父兄忠于明。不應舉。惟攻古文詞。其于畫天性也。山水學王蒙。既與常熟王翬交。曰。君獨步矣。吾不爲第二手也。遂兼用徐熙黃筌法作花鳥。自爲題識書之。世稱南田三絕。宋尙書犖語人曰。南田畫。吾暗中摸索能辨之。世多贗作。其至處必不可贗。王太常時敏。遣使招致。先生方出遊。不時至。至則太常已病。喜甚。榻前一握手而逝。先生家甚貧。風雨常閉門。餓以畫爲生。然非其人不與也。卒年五十四。子念祖。不能具喪。王翬葬之。

論曰。昔淮南王敍離騷。以爲其志潔。故稱物芳。蓋深知屈子者。先生泥塗軒冕。鶉居蟬飲。身世之際。可謂嚼然而世徒以畫知先生。未矣。然先生之志之潔。于畫何嘗不可見哉。

惲氏作畫。自香山先生始。遜庵先生以枯墨作山水。殊古簡。然非作家。後南田先生負重名。羣從子弟皆作畫。遂成風尙。今畫法多流蕩矣。敬謹擇其有意者。著之于左。

翊字相白。畫學南田先生。

源濬字哲長。善吹鐵簫。號鐵簫老人。天津縣丞。畫法一準徐熙。下筆有芒角。生氣盈涌。如雲展潮行。惜稍俗耳。爲人爽邁。任氣必踐言。去官後卒于天津。

源景字希述。冬官正。轉工部主事。畫法黃筌。官京師。垂五十年。無車馬塵屋蔽幃。不見厭苦之色。

冰字清于。父鍾。南田先生族曾孫也。冰寫生芊綿蘊藉。用粉精絕。映日花朵俱有光。適同縣毛生鴻調。不應舉。築小樓。夫婦居之。以吟詩作畫老焉。

宅仁字原長。畫多賈。南田先生然質重韻味無絕勝者。

與三字德三。歙縣教諭。能山水花卉。筆法清婉。兄弟皆困乏。爲教諭不能贍其家。棄去。鬻畫京師。雄縣。遂卒。

楨字溶堂。流寓吳門。渲染折枝爲佳。樹皮石骨微有習氣。性淳朴寡言。終身爲鬻畫。賈捉刀。罕自署名者。年五十餘。卒於虎邱。吳江翁維補附。

# 南田先生家傳二

從孫鶴生纂

翁名格。字正叔。一名壽平。別號南田。而南田筆墨之名特著。翁生而敏慧。眉目秀朗。父遜庵。授之書。上口即能解義。八歲咏蓮花成句。驚其塾師。遜庵任理學。講經濟。崇禎末。吏部特薦。將以諸生起用。而遭變。故翁方十餘齡。隨父崎嶇閩嶺。流落相失。旗帥主某。愛其聰穎。欲子之。遜庵既以緇衣得免。偵子在某所。其帥主媪。酷奉釋氏。將挈之過靈隱。因屬寺僧。善言誘接。指此子慧根極深。惜福薄壽促。宜令出家。即日剃染留寺中。媪泣之而去。既歸。遜庵既禿其鞞帽。易寬袍大袖。督課經傳。儒先之書。不少貸。翁之澹靜高逸。蓋本家學爲多。翁至孝。事遜庵。先意順志。數十年無怠容。遜庵爲復社遺老。學問節概。東南碩果。四方聲氣。湊集。翁張筵脂葦。賓餞成禮。家無遺貲。恃筆墨以供。而世之知翁者。亦多以其畫。畫筆得于天性。少工山水。咫尺千里。烟雲萬態。多仿黃鶴山樵。既與虞山王石谷交。石谷筆意極相似。翁顧而嘻曰。兩賢不相下。公將以此擅天下名。吾何爲事此。乃作花卉寫生。含苞怒放。殘英半墮。重跗疊瓣。渲染皴裂。多出意匠。尤善會徐崇嗣沒骨法。閒作一蟲一鳥。傳神阿堵。刻欲飛動。而題語書法兼工。故世稱南田三絕。婁東王太常。愛賞特甚。屢遣客招致。而翁方出遊。所至傾慕。虛館爭迎。不能即往。迨往而太常已病。聞其至。喜甚。



請至榻前。一握手而後瞑。故留館婁東最久。商邱宋冢宰。開藩于吳。禮聘爲布衣交。親玩其下筆設色。凝思神妙。常語人曰。憚南田畫。吾暗中摸索。猶能辨之。世多贋作。其至處要有必不能贋者。爲名人歎賞如此。身沒未十年。一縑之貴。購數十金。又不厭以筆墨重。重其品也。翁性拓落。不事生產。不知握筭。稱較銖兩。有薄田數畝。幹僕管之。俟翁遊而歸。知其贈貽盈筥。輒持帳簿夥夥。言某年逋賦若干。某年貼役若干。家食用若干。故聒聒不已。翁纔展帳。攢眉推案起曰。吾不耐此俗事。任汝取所欲去。遊裝每數百金。家人散漫。輒隨手盡。贋翁筆墨者。或以富而翁無以家爲。翁之卒。僅五十有八歲。

贊曰。翁于余爲從祖。翁之曾大父。余五世祖也。以嘉靖丁未進士起家。官至參議。與王弇州、李于鱗友善。往來贈答極多。翁之文采風流。所從來遠矣。其筆墨。世人無知與不知。咸重之。不論論其詩。翁之爲詩也。選意必幽。擇辭必鮮。俗塵凡語。自然不侵其筆。而涉于身世之感。悲涼衰颯。托寄遙渺。意致深長。有未易爲外人道者。著若干卷。藏于家。

# 凡例

先生卒年。惲鶴生傳五十有八。續疑年錄同。而惲子居傳云五十四。畫徵錄言六十餘。彼此互異。按先生生崇禎癸酉五十八歲。當卒於康熙庚午。石谷己丑畫柳跋云。南田前有題余畫柳詩。今南田沒。且二十年云云。逆計之。適得庚午。則鶴生傳似可信。且手署畫上年月。己巳後亦未概見。

是編以南田詩鈔爲本。康熙丙申。武進令孫公椒圃所刊毗陵六逸集之一也。五卷外所益石刻。則寶懌室、味古齋、清獻閣、愛石山房諸種。從吳江翁君小海、維秀水計君二田、光旸假得。暨家藏吟香仙館、甌香館帖、謝氏望雲樓帖中詩。外此畫幀字幅。與夫友人寄惠者。共爲十卷。吳縣貝君壻、潘君邈、復錄示手書詩卷。又增數紙。而蒐羅考訂。則翁君之力爲多焉。

先生畫理精微。發爲議論。超妙名雋。因就計君假本。益以石刻等。爲畫跋二卷。附後。其有詩者。附注題下。此不更見。書跋數則。不復另列。尺牘概不闌入。

古人詩集。不外分體編年。其詩卷墨蹟。于戊申己酉。署江上紀愁詩。于甲寅。署江上詩。意當日或有手定編年分集之本。然不可得矣。詩鈔既不分體。又言見輒繕存。故前後舛誤。今詳考之。自辛丑迄己巳。三十年中。尙多可見。依以詮次。無考者。視人之前後。詳其詩意。分廁其間。所愧未能博綜。不免麤亂。是所

望於讀者

先生每有一詩。先後題畫。而字句更易者。茲刻但從一處。若卷七江山圖。八卷題江山之類。又以後半迴異。故且並存。至小幅折枝。寥寥數語。初非鴻篇鉅製。可核體裁。則或爲錄舊。或由依託。間恐誤收。然題畫小詩。本多信筆。非大家名家存稿。專論格律者比。

是集十二卷。編於戊戌。迨甲辰秋日。戴醇士閣學。熙寄示所錄詩跋。去其重複。并增以續所得者。不復攙入。別爲補遺。各一卷云。

# 甌香館集目錄

卷首 序 傳 凡例

卷一 古今體詩

卷二 又

卷三 又

卷四 又

卷五 又

卷六 又

卷七 又

卷八 又

卷九 又

卷十 又

卷十一 畫跋

卷十二 又

卷末

補遺詩

補遺跋

附錄詩

附錄評

# 甌香館集卷一

武進惲 格著

海昌蔣光煦輯

## 贈湯公牧

髯公遺世想。五嶽挂一身。每爲諸侯客。常稱江海人。爽氣森眉宇。豁達披天真。名都振高價。藝林播清塵。挾藻走風雨。應機如轉輪。扶疎嶧陽桐。貞直會稽筠。胸無千古憂。顏若桃花春。酒酣欲狂叫。笑脫頭上巾。當其快意時。浩歌動秋口。山池夜吟處。得句驚鬼神。觀世同海鷗。百喜無一嗔。或垂語谿釣。亦採南湖蓴。戲爲鷓鴣舞。醉吐車中茵。借問箕穎輩。誰能知隱淪。

## 贈烏目王山人

斷壑崩灘古洞門。誰移石壁種雲根。懸知灑墨如風雨。亂染煙山紫翠痕。竹雨桐風盡入元。阿誰參得巨公禪。看君畫石如雲手。落紙精華已百年。寥落南宗與北宗。天荒今見畫中龍。高雲都入王郎卷。亂覆清谿八九峰。繪苑誰稱絕代工。興來搖筆撼崆峒。何知我輩千秋業。萬國鶯花閉戶中。

煙蓑

煙蓑無恙碧雲知。千樹紅霞一釣絲。轉笑非熊谿上叟。白頭猶作帝王師。

王郎移家桃源澗

寥幽綴山楹。解轍弄薜荔。上交杉篁音。下瞰欲無地。激波澹花林。翰墨散春氣。半壑異昏明。瑤琴枕獨寐。窺庭如在山。探山山暉闕。有時風雨來。襟帶亂空翠。應聞天雞鳴。或與猿鳥值。出入徑寸閒。森然萬象植。雲物敢祕精。造化同得意。元黃改囊籥。陰陽無根蒂。振冠千載上。浩蕩騁靈轡。

送王郎還琴川詩

不歎息

猶記余從南村走東郭。時已就暝。不得復見。宵分徒倚庭隅。索句既成。明日書扇。舟次誦詩唱別。同人見余與石谷交誼如此。近世所無。莫

海雲沈山雲不飛。吳川落月霜滿衣。折殘桂枝怨秋冷。葛屨山人歸未歸。錦衾宵寒崇蘭濕。菱蘆雪浦飛鴻入。芙蓉渡口飲君酒。鯉魚風起秋濤急。吳娥坐鼓蘋花楫。滿船都載丹楓葉。

墨雨

墨雨橫高嶺。靈煙近欲無。拔山應有力。不用問天吳。

歲寒圖

寒花遠與歲寒期。夜起移燈看雪時。未許東風到桃柳。山茶先發近窗枝。

送姜子至淮南

離絃夜響琅玕圃。曉捲珠簾別鸚鵡。一囊花鳥裏春煙。半束丹鉛捲秋雨。走馬侯家看鬥雞。朝箏夜管三時舞。東園書客賦斷蓬。劍氣忽散垂天虹。蟲淒露重葛衣冷。淮南桂樹生秋風。我夢銀灣不得度。羈魂夜夜天西路。君正懸帆吹向西。西游從我夢中去。渴飲不辭千里井。坐看江雲過吳嶺。白蘋花裏送蘭舟。碧雲天盡無帆影。

長干訪友

桂樹落紛紛。江干過雁羣。鳥邊銜落照。馬首墜殘雲。草色碧煙合。江聲白鷺分。今宵看劍氣。名已動秋雯。得僧忍信作

尙作諸侯客。栖栖湖海間。藥囊支杵臼。襤被老江關。一鳥下吳苑。無雲見越山。賣文稱玩世。奇字幾曾刪。題紅林秋浦

只愛菱洲蟹舍邊。千林紅葉一谿煙。夕陽柳岸收漁網。秋水蘆花放鴨船。

中秋夜。同不遠。九日。次谷。台臣。立雲諸子。集右文園池。卽席有作。和許郢州鶴林玩月詩韻。

清宵輪影望中圓。一碧全消萬井煙。徹曉不知秋有夜。澄空渾似水爲天。霓裳忽度屏山下。烏鵲驚飛玉鏡前。醉語豪吟筵上客。莫教丁卯勝今年。



送筠土上人入閩次許九日韻

雲邊飛錫傍山行。爲愛看山不計程。關樹秋連千嶺出。江天風帶一帆輕。曉吟鰲浦波神見。夜嗽龍臺旅夢清。知爾觀空無住著。種桑填海未須驚。

寄石谷先生

方從天畔憶瓊枝。何事春鶯出谷遲。青鳥竟違前歲約。碧雲深負故人期。叢桂虛堂生曉寒。琴川書到問加餐。明知怪我前期誤。不忍開書樹下看。敝箬猶戀舊蘭叢。忽見桃花千樹紅。莫道蒲帆容易發。石尤先作故園風。

雙魚尺素語千行。字字毋忘王太常。無那相思東向立。海雲天半望扶桑。

余與奉常先生。十載神交。未酬一見之願。

相期雪後問梅花。

梅仙錢君致書相招看梅。即泛婁東之棹。

同泛婁江江上槎。豈有重雲封谷口。海棠開遍未離家。

穹廬舊事恨飄零。地老天荒夢未醒。公子初翻新樂府。他時筵上斷腸聽。

王君憚民。譜余六舊事。佳話傳奇新詞。贈余一時。

也

年年芳草怨離羣。有夢如何隔斷雲。此夜若隨明月去。劍門巖畔定逢君。

三月望後一日。在半圓月下作。

雪衣零落過春溫。殘夢還霑舊淚痕。

予與石谷。皆抱伊蒿之痛。每於夢中相持慟哭。

立斷東風人尙遠。落花殘月共消魂。

瑤臺月落不聞簫。春去人傳玉樹凋。東山終爲多情死。絮酒從君哭海潮。

予未識匡令王君。而遙相愛重。有如夙契。正擬過從快

寒之。忽聞已赴玉樓。石谷

墨華飛處起靈煙。逸興縱橫醉玳筵。自有雄談傾四座。諸侯席上說南田。石谷逢人說南田生不置。未免刻畫無鹽。

### 九日園池眺望有憶

身健長爲客。登臨興不窮。煙藏一岸碧。霞散半池紅。秋送寒花裏。人留空翠中。山靈應我笑。無帽落西風。  
爲愛名園好。游蹤未擬還。花妨三徑曲。天放一身閒。落雁沈秋影。晴楓入醉顏。欲憑高處望。家在夕陽山。

### 答次谷

月裏悲秋倚玉闌。青天碧海夜漫漫。只因未識姮娥恨。猶向人間說廣寒。

### 酌酒與次谷

君懷明月向誰投。我抱胡琴都市頭。話到英雄淪落恨。當筵同唱灞亭秋。

### 上巳日從家君過些庵。賦此言別。

闔閭城外水蒼蒼。芳草王孫返故鄉。風雨孤踪隨杖錫。帆檣三月下瀟湘。驚心楊柳離宮遠。回首山河別路長。此去若逢彭蠡雁。好傳消息到吳閩。

### 爲董十畫松谿圖

以君邱壑心。發我林泉想。曲折入毫端。玲瓏落指上。真宰無祕趣。空靈動新賞。煙灘翻層波。風谷藏秋響。

滄洲如有求。夢與高雲往。

堯封和尚。屬圖深林茅屋。懸瀟湘客亭。

石壁高松鶴夢閒。吳煙楚雨護柴關。隔窗恐礙雲來往。屋裏長懸屋外山。

夜半驟雨自起移盆蘭

種蘭移石近雕櫺。夜砌濤翻散濕紅。神女誤飛驚夢雨。湘靈忽送入琴風。含苞不帶崩沙下。暗葉頻低泛沫中。只恐香隨濃霧散。起燒銀蠟護春叢。

關山月

關山今夜月。少婦隔年情。毳帳吹羌笛。梅花落鳳城。心驚征雁影。腸斷擣衣聲。極目三千里。黃雲滿北平。

對酒

對酒不能飲。將何慰此生。偶然成小隱。豈是薄浮名。筆欲兼風雨。詩真悅性情。燈前觀醉者。一笑絕冠纓。

閒吟桂花下

枝上霜氣清。樹底青苔薄。密葉漏金風。空階細花落。花向月中飄。秋從花裏過。愛月恐秋殘。吟秋枕花臥。香風夜不歇。秋雲晝不開。虛堂賦招隱。人在小山隈。

君莫愛羅浮。乾坤老此邱。花閒猶有我。樹外更無秋。

子與陳季公同行白門道中。三日夜而別。後六年。再過西泠。始識其家。因作憶昔歌。

憶昔秋花白門宴。烏衣巷口曾相見。東來並馬下長干。嵐風谿雨吹人面。君歸吳山月。我踏蘭陵草。明月懸青天。芳草不常好。蘆花照絲髮。海水亦云老。舊日經過挾彈兒。結交漸見幽并少。狹邪輕薄徒紛紜。國士傾心只有君。黃金無力劍光冷。意氣直欲排天雲。關南尙綠當年柳。吳歌空憶旗亭酒。半橐曾分劇孟裝。片言遂白江郎首。蕭蕭蘭浦漁潭客。風波獨泛巢由宅。千里書紳一片心。十年風雨同今夕。六橋春風油壁車。相思江岸落桃花。卻怪夢魂無覓處。今朝始識孟公家。

同李非夏湖山眺望

春愁正滿落花天。不見王孫又幾年。添得湖山今日淚。玉簫吹斷鷓鴣煙。舊夢湖南春雨空。高歌無地望崆峒。囊中自有江山在。亂採鶯花入變風。白馬江潮自往還。鷗夷舊恨滿吳關。可憐都作啼鶻血。紅遍西湖夢裏山。天地容吾未老身。煙雲不改舊時貧。西湖四月無游女。獨採蘋花待故人。

送范仁伯還天台

范生倜儻非常儔。紛紛結客皆貴游。黃金叵羅不辭飲。酒酣自擊珊瑚鉤。閉門一月不見客。聞子將歸故

山屐青翰之舟木蘭榼。送君驪唱城東陌。白蘋煙渚望無涯。吳山一帶秋雲隔。千里風帆不可留。河梁一曲愁筵篋。新涼前路吹征裘。曹江東渡桂花秋。天台四萬八千丈。華頂峰高白雲上。危崖層林虎豹啼。異花瑤草盈清谿。石梁蜿蜒橫丹壑。瀑布如雷雙澗落。昔時游履未可攀。十年夢在桃源閒。聞君家住赤城側。朝霞自染裳衣色。因聲爲我告山靈。江南有客常相憶。

十四夜無月

風雨聲中過雁羣。秋蟲夜坐不堪聞。誰將江上桓伊笛。吹散關山萬里雲。

春游憶邵僧忍

邵續西游日。江帆此地迴。獨攜鸚鵡賦。還傍鳳凰臺。芳草三年信。梅花一夜開。思君千里月。倘向夢中來。

元白新齋分韻

若得林泉意。清暉生座中。水紋侵面綠。砌葉待霜紅。語歇前簷鳥。寒生北牖風。曲廊頻指點。疎處未移桐。

送家舍萬叔入洛陽

孟秋涼風發。促織夜悲鳴。素商卒以厲。蕙草凋前庭。驅車河梁上。駕言遠游行。感此節物徂。離別難爲情。攬轡臨修途。北風吹長纓。瞻念親骨肉。涕淚浩縱橫。諸父與昆弟。落落如晨星。良會不須臾。奈何復長征。願瞻動愁思。鬱鬱情難平。

閉門謝人事。臥病城東廂。開有宛洛行。惻惻情內傷。燕趙多佳人。瑤箏激清商。曲終起徘徊。撫劍徒慨慷。仰視河漢間。衆星列成行。悲歌發廣坐。把酒不盈觴。有酒豈不歡。沈吟在他鄉。故鄉常相依。異鄉常相違。鴻雁過前除。淒淒向我悲。今日故鄉別。明旦異鄉客。異鄉亦何遙。相思鬢如雪。徒倚谿路側。丁寧語非一。迢迢千里心。引領歸飛翼。

曉行深谷

樹暗不斷烟。崖蜂時墮蜜。藜牀荔垣薜交絡。檜雨篁陰不見日。松梢風過落藤花。仰看飢颺啄山栗。

紅林圖

琴書都在翠微中。吹斷泉聲半嶺風。盡道此山秋不入。無霜林葉爲誰紅。

寫霜林圖

石壁無雲澗戶明。密林風勁曉寒生。秋堂山影琴中聽。都作煙泉落葉聲。

綠楊停鞭圖引贈高生

腰下寶玦光。手中黃金鞭。脫轡下晴甸。披襟臨芳川。柳枝纖翠玲瓏烟。桃花日漾紅霓鮮。初從五嶺來。又向三湘渡。燕市悲歌已倦游。越江繁華不肯住。錦帶曾分荔支雨。囊韉半蝕檳榔霧。空留郢雪絃上聲。常籠翔雲馬頭路。囊中寶刀千金裝。當場贈客何慨慷。關西豪俠盡。劇孟在錢塘。灞陵醉尉豈敢問。射生意。

氣誰能當。陌上解紅韁。問爾獨立何傍徨。不羨武陵花。還思彭澤柳。將軍莫言爲客久。聲名常滿曹生口。  
壬寅秋夜。與石谷王子。同飲半園。唐雲客先生四并堂。次日。余之白門。歸舟得句寄贈。

秋堂叢桂醉花茵。猶憶更闌風露身。今夜長干還對月。月中不見隔宵人。  
天畔離思夢未醒。登臺秋露下殘星。落花吹徧江樓笛。徧在關山客裏聽。  
白練空江天倒流。蘋花風雨晝登樓。江山不入王維手。碧草紅林未是秋。  
千春雪曲許誰工。唱拍曾無古調同。我去白門還慟哭。迴車應不爲途窮。  
懷人天畔望江楓。駝背金笳落照中。多少秦淮河上柳。一時吹斷鷓鴣風。  
蒹葭霜落雁南飛。九月游人未授衣。卻向三山望江水。滿天黃葉一帆歸。

冬筍

破寒抽嶮谷。原不待春雷。湘籟排山出。瓊芽割地開。鋤雲分鳳尾。帶雪選龍胎。莫惜干霄節。先教入饌來。

松子

仙實來千里。雲胎起百尋。蛻皮鱗甲在。香味雪霜侵。塔有重樓勢。北人呼松子爲松塔。房連偃蓋陰。玉盤初剖食。粒粒歲寒心。

贈徐蘭生

杜門歲月草元成。書帶青青石檻平。家在南州稱孺子。人從甬里問先生。寒蓬雙徑烟霞沒。夜雪空巖鹿豕鳴。梁甫坐吟人未老。山川寧負臥龍名。

夢與石谷畫游魚。既寤咏詩爲圖寄之。

林葉索索冷秋圃。碧紗夜火如沈霧。夢剪吳娥機上霜。拂拭清光三尺素。若有王郎倚繡茵。墨花暗染蘋花趣。芙蓉雨。蒲塘路。荇帶青可憐。儵魚影相聚。蓮葉田田不可數。錦石雲漪渺難渡。風濤亂菱蘆。天河落白榆。槎頭久零落。丙穴今有無。漆園濠梁語。將軍池上圖。研塵寒。花房曙。水光風影魂驚處。點成雙鯉擲滄波。銜書直向婁江去。

海昌東門望海

海老神蛟入夜哀。觀濤曾見水雲開。奔雷欲散連鰲雪。一線橫空白練來。海氣蒼茫冷鬪袍。幾看明月蜃樓高。可憐精衛當年影。片石猶懸大海濤。尖山地盡是天根。跋浪鼉吟白晝昏。豈有颶風來大鳥。漫將鐘鼓過東門。

短歌行

明星在天。哀鴻叫野。雲中之君。紛何來下。虎豹在側。羽翼銷謝。我獨憂勞。將告誰者。臨觴不御。揮淚盈把。逝將棄之。沈吟未舍。寫我心曲。作爲短歌。子之不聞。云如之何。



新筍

露籜穿苔瘦。龍孫漸滿園。拔山知雨力。削玉破雲根。舊淚瀟湘染。新雛嶰谷繁。看他長毛羽。碧漢起飛翻。

游仙曲

天衣如雲初拂石。碧眼仙人散紺髮。上有瓊華照銀闕。綠波無風見蟾月。瑤圃玲瓏翠相結。赤城鱗鱗堆絳雪。採香仙妾紛成列。東行海水飛塵積。盧敖綠玉杖九節。齊侯棗花散餘白。上元酒盞澄天碧。蘆刀刻髓流金液。行廚包鱗烟五色。海上歌鸞聞樂闕。山河率舞靈妃悅。白鶴西飛一雙雪。漢殿何年種桃核。真人宵光眼相射。欲耕下土無阡陌。鼉鼉驅風移水魄。榆柳凋枯安可摘。昆侖破碎非我宅。騎龍奔雲九關關。登降帝臺杳無迹。坐捲紅霞展瑤席。手頓羲和不敢夕。

送季子游薊

公孫閣在夜螢飛。珠履平原客到稀。但使姓名通狗監。肯教風雨戀牛衣。殷勤脫贈呂虔刀。報我江聲八月濤。燕市無人還買駿。金臺天半爲誰高。

楓葉

袍草非舊色。谿林無碧影。別有青女機。能製霜天錦。

秋水征帆圖

一作送董子游浙東。

蟋蟀啼漸寒。蕉梧響殘雨。班馬聲驚送客魂。蒲帆影上秋風浦。江路紅林霜葉下。何處風煙堪秣馬。千里雲濤未可從。三秋芳草誰同把。葡萄樽。芙蓉裝。別館清絲淒鳳凰。一夜夢隨青雀舫。月中搖蕩過錢唐。離鴻秋噉噉。離夢夜悄悄。未忍調朱絃。離聲令人老。黃華滿三逕。璧月不獨照。枯蒼盤盤嵐陰道。秋雲片片如飛鳥。紫騮且莫入梨關。待我聯鑣踏春草。

題畫白芙蓉便面

奇服吾猶在。秋風寄所思。美人應未遠。悵望涉江時。

題畫贈子純

鶴語驚寒曉夢還。彈琴花落半庭間。指頭猶有分雲力。更向雲邊著米山。薜荔山阿若有人。富春圖裏過殘春。欲知迂老驅毫意。天海蒼茫一問津。閒將詩句答山靈。奇想烟泉未肯扁。不雨墨華常帶濕。窺人嵐氣欲浮青。

題梅花庵主大幘

金池自洗芙蓉鏢。華嶽何須巨靈鑿。素練忽破青天痕。墨雨橫空萬山落。

夜集羅子齋頭

月挂天心列宿稀。金尊華燭照羅幃。當筵頻按漁陽珍。江左詞人淚滿衣。

西泠別趙公子

握手躊躇怨別離。銀燈良夜倒金卮。愁心欲託琴中曲。彈絕朱絃君未知。

秋風曲江吟送又駢姪之金陵

井闌欲墜青桐葉。蛾眉未吐初秋月。芙渠金粉散蓮塘。相送輕車秣陵客。綵箋獨寫紅蕉牖。玉壺不注葡萄酒。長歌自擊雙蒯緤。鳳絃聲激驪駒後。白藤織笈在馬首。垂鞭直指秦淮柳。我獨蓬蒿長閉門。折芳難寄三山友。揚子尙元固有會。鄒董那得居其右。子雲翩翩白麟對。出關建節驚關吏。仲華得志亦少年。豈今千里輕龍驥。桂花蕪蕪江雲翠。莫後秋風曲江轡。

題天池石壁

深樹烟開礪路分。瀑泉時向靜中聞。翠微忽斷丹崖影。吞吐層嵐是白雲。

桃花紫藤

石泓纔解研池冰。又對桃花憶武陵。神女只愁春欲去。護花千縷繫長藤。

蒲柳小幀

曲江何處夢前游。點筆春風此暫留。只爲少陵詩句好。至今蒲柳尙含愁。

題草花扇

燭然一笑散朱樓。笑拾殘花過陌頭。誰道芳華容易謝。此中紈扇自無秋。

靈巖春雪中贈香忍師遠遊

響屨廊前三尺雪。堯峰背口連天白。凌兢澗道冰龍鱗。長涇短港行舟絕。故人將行復有待。愁緒如絲不能歇。嶺上寒梅未吐萼。陌頭已變垂楊色。黃鶴乘風返顧時。孤鳳鍛羽將離日。時兩郎君隨行繩牀毳衲擁霜風。垂白生涯瓶錫中。一寒范叔誰相問。張儉飄零道轉窮。西山之蕨豈能飽。乾坤何地容吾老。明日春雲滿洞庭。消魂又別姑蘇道。可憐五里一徘徊。無盡山川一往來。瘴癘烟沙那可渡。瀟湘亦是風潮路。冷棗栖栖無定蹤。棲若輕塵散如雨。還留十載舊青氈。卷面春風且西去。賣漿賣卜姑待時。抱璞豈肯求人知。握中團扇河梁詩。欲置君懷君勿辭。但能別後長相思。

贈故將馬君

楚客無家興自豪。十年風雨賦離騷。金丸馬上彈飛鳥。碧椀牀頭泛濁醪。鴛水青鞋仍半錫。龍泉寶匣自雙韜。手搴芳草思公子。惆悵春江二月濤。

畫奇石與商文上人

五丁無力鬼斧拙。誰遣山靈斲山骨。玲瓏意匠驅化工。不使僧繇弄丹碧。嘉陵粉本並在心。生綃十丈能相尋。少文已去風流盡。空揮玉軫無知音。此時縱目谿山裏。何處苔衣堪漱齒。馬足風沙起翠微。芝草摧

殘白雲死。披拂靈烟一片石。千巖雲月曾相識。飛塵不度猿鳥稀。雕績春風幻空色。眞想橫經正瀟灑。紅  
蘭窗外簷濤瀉。峻嶒峭蒨能娛人。手展藤箋爲君寫。

同不遠九日淮雲寺看秋色

寺爲前人古墓。有老  
樹參天。千年物也。

出郭望秋色。野無羣峰青。相呼入化城。秋日照金經。其中有喬木。結根護幽局。下枝礙雲鳥。上枝穿青冥。  
仰見細葉落。點點如寒星。荒臺聚鳥雀。臥碣無留銘。白鶴幾時來。華表餘荒汀。花龕散涼草。清磬出虛櫺。  
徘徊寒翠間。秋雲爲予停。人生若朝菌。慨然念冥靈。念此愴中懷。浩歌還郊坰。對菊酌君酒。但醉不願醒。

水雲亭雨夜留宿分韻

蓮華初滴漏。人影聚梧軒。暗雨喧簷竹。寒雲壓寺門。僧瓢分白墮。佛火共黃昏。願借維摩榻。新詩好細論。  
獵犬詩題畫

立殘斜日禁園身。馳道風微不動塵。料得炎天休較獵。未須回顧按鷹人。  
不用傳書去復回。閒思狡兔立荒苔。知他得志圍場日。肯避南山白額來。

夜渡陽湖宿西山楊子別墅

路轉一峰迎。風兼五兩輕。月波寒不定。烟岸夜難明。鷗浦春邨火。漁梁布網聲。西山同宿處。猿鶴待歸纓。  
雪後梁谿歸棹口占示同舟諸子

立春前  
一日。

棹轉西城路。衝烟夕鳥來。雪留殘臘在。帆帶早春回。爐火侵燈影。谿光入酒杯。歸從高閣裏。詩興待觀梅。

送楊生之無爲州

山郭春聲聽夜潮。片帆天際白雲遙。東風未綠秦淮柳。殘雪江山是六朝。

戰艦寒潮古陣雲。亂鴉荒墨弔斜曛。大江西岸濡須塢。春水方生我送君。

歲晚從家君諸禪侶登翠臺

登臨歲月晚。烟火望寒城。遠圃牛羊牧。荒原草木平。湖雲連晝晦。嵐氣轉春晴。攜手翠臺上。山川萬古情。

羣峰通震澤。涇水入蘆汀。雨雪殘吳苑。烟雲出洞庭。湖光生夜白。島嶼落空青。歲暮鄉關遠。征轍未可聽。

寄家叔時在山右

尙憶春前札。猶憐草木身。叔父書來。以尙北山仍獨隱。南阮自長貧。詞賦難遊洛。縱橫不說秦。灌園殊未得。深愧漢陰人。

貧賤娛親老。春秋物外期。空餘衰鳳曲。無那美人思。東絹分來日。南金寄到時。多慚千里贈。徒報四愁詩。

叔父致幣。爲大人薦。大人報詩謝之。

廣武登臨處。吳雲萬里看。駒駝鳴海國。苜蓿滿江干。日月窺愁短。家山到夢寒。東南好風景。花鳥竟凋殘。

辛苦西遊日。星霜望塞州。幾回看鏡破。長自問刀頭。天闊雲隨鳥。月明人倚樓。寒衣莫寄遠。歸馬不逢秋。

曲巷偶見

暗路出苔茵。驚鴻忽近身。脂香能醉客。步怯欲依人。燈轉斜窺鬢。羅輕不動塵。扶牆遮袖立。飄渺洛川神。

蘿洞舊隱圖

猿鶴不驚。草堂猶在。能重游於箕穎間乎。鏡機既新。枉駕非遠。昔日雲蘿當復在念。知元亭中人。或不怪笑也。甲辰新秋。畫蘿洞舊隱圖得句。

秋崖蒼茫澗路深。茅亭石瀨泉聲過。風潭百頃青琅玕。碧雨冷然展書坐。叢桂還留古洞霜。滄洲空老舊荷裳。白雲只傍青山宿。不信人間有帝鄉。薜蘿猶作舊時看。耐得秋風一夜寒。谷鳥何心思錦樹。谿山無夢到長安。

墨菜

用巨然濃墨法。以應梅山湯髯翁。

灌園我在城南畹。他日留君花下飯。曉露新抽翠甲肥。春鋤更刷黃芽嫩。何煩和鼎間三豔。鹽豉和羹爛似泥。最愛山家風趣好。不將肉味勝金齏。

清溪釣隱圖贈三蘿曹子

何用江潭問醉醒。垂綸閒在藕花汀。知君不著羊裘坐。猶恐人疑是客星。卻笑鷗夷在五湖。漁竿天畔倚珊瑚。世閒何必人知我。醉狎羣鷗一釣徒。回首塵寰思黯然。風波無地可高眠。于今到處爭香餌。誤盡游魚亦可憐。

題雪圖

風前銀河路。天半玉芙蓉。瑤妃映珠樹。白鳳舞巖松。

# 甌香館集卷二

春夜作

瓶花香散一庭寒。禿穎摩挲展素紈。竹裏風聲當夜急。推窗北斗挂闌干。  
路鬼挪揄敢笑人。朝榮木槿恥言貧。金門漢時今安在。看爾何心對白麟。  
十年吾意在滄洲。珠樹江妃想夢游。但使山中松桂好。不將詞賦動諸侯。  
新蘿將換舊衣裳。夜鶴無聲對草堂。袖裏鶯花詩句滿。手中江海釣絲長。  
有誰放筆敢稱癡。繪苑滄桑某在斯。墨雨久令千載祕。青山還許少文知。  
囊韃南國雉壇盟。白首應論傾蓋情。吹罷壘簾君莫笑。更聽雙劍作龍鳴。

王丹麓過訪東園有贈

獨鶴鳴空江。孤篁抱瑤水。飛龍待新奏。鳳絃未伸指。徒歌息園扉。寤寐望彼美。  
振策響霜筠。車音動蘭汜。忽逢柴桑輿。遂倒東郭履。窮棲傾賞心。陳歎變新喜。  
彪彩旣爍席。冷風流貝齒。瑤華余盈懷。睠藻亦云侈。珪琳念當合。  
神聽協宮徵。躊躇問所歡。繾綣書一紙。荆雪想西帆。時程邨尚在豫楚之間。  
丹麓屬余致書相訊。吳霜滯東軌。卷蓬掩征塗。堅冰截人趾。  
將從剡上期。終阻湖南市。淵情爲爾竭。欽矚何能已。



在東園東毛稚黃

海雲茫茫春霰斷。柳絲綠遍寒江岸。細網幽窗竹煙亂。山桃海棠落將半。鳥聲過殘雨。蘭風細吹案。我思在空谷。我夢屬雲漢。銜璧只獨照。錦衾空宵爛。飛花濛濛還坐歎。江郎藻筆不在腕。石泉水芹泛谿館。柳下無人待誰鍛。

贈徐徽之前輩

不見口黃日。口忘四七期。乾坤公尚在。風雪夜何其。九野占鶉首。千家哭繭絲。美人春信遠。花鳥正相思。

暮春野外暗記

祭酒嘯吳鉤。江花對楚囚。獨醒觀蟻蛭。含笑問蜉蝣。歷數成口口。蟲沙聚此邱。十年臺笠下。口口夢西周。

客夜作與李七

竹霧蔽山樓。茶烟冷蒨綠。孤蹤風雨夜。同話古今愁。有歷無三月。殘編託九州。唾壺歌欲斷。隱几夢鴻溝。

吳山偶歎

盟府丹書在。空懸皓首期。一言虛刎頸。千古泣燃其。白壁君何有。青蠅爾獨疑。盜泉爭飲地。迴轡敢濡遲。

贈王丹麓

丹麓三過高雲閣。余詩文。因作歌。

王子著書常滿屋。晝吟自對庭前竹。三過高雲詩未成。一彈再歎無絃曲。投我青琅玕。知我愛奇服。終朝

采香不盈掬。終年種石不得玉。大荒陰陰秉熒燭。百鳥喧喧稀見鵠。雕蟲壯夫亦殊苦。對客何能賦鸚鵡。囊中藻筆皆鸞龍。鏤冰文章棄如土。但令英爽果絕塵。片語何妨亦千古。有誰海岱推國工。馳驅藝苑無追風。棄擲瓦缶鳴清鏞。沐浴冰雪開鴻濛。眼中乃有王君公。

贈郡別駕

九霄忽起郎官色。駟馬初分澤國春。自舞漁蓑窺露冕。敢攀青桂傲朱輪。瑤華夢冷崑邱雪。珠樹天迷瘴海塵。篋裏寶刀猶可贈。肯將麟閣誤鮫人。望履初從幕下趨。每從風雨問菰蘆。我因結襪知廷尉。客爲彈冠識大夫。半卷陰符酬麥飯。三春醉雪臥江湖。遙知按部中吳日。先有軒車過酒徒。

寄里中同懷諸子

昔君過我別。桂樹下微霜。今我憶君時。蠶妾行採桑。陰風吹酒罏。九陌無紅韁。我珮久塵土。我馬悲元黃。彪騫企先路。蘭草含其香。靈臺多落英。湘水皆斑篁。□□起中夜。星宿閉晶光。天語不可聞。狐兔何荒唐。七襄豈無文。安知非報章。弦魄有時望。晨鳥聲未揚。折柬召園公。拊手南山陽。

畫碧雲青嶂圖贈李子

拔穎衆山響。濕翠上紈素。忽然見天吳。研北風雨度。瑤水不生濤。嵐暉如隔霧。青葱石林氣。浩蕩滄洲趣。

碧雲悠然來。帝鄉不肯住。虎嘯懷陰風。鶴鳴想天路。將從禽巒。豈習巢由步。莫問山中年。且臥蘭苕圃。

寄王丹麓

五月廿三日。期又競。稚黃。東琪。虎男。次日。訪北墅王丹麓。會大風雨。諸子不果來。因思客歲。丹麓從冰雪中訪我東園。我輩今日盤桓。不及王郎遠。

矣。口吟自嘲。并題畫扇寄北墅。

密雨千門正未開。無人同破北山苔。雲邊悵望迴車客。曾比王郎踏雪來。

松風忽向藤箋落。贈爾谿山分半棗。清琴不動想停雲。我在城南君北郭。

贈非夏李七

時將乘槎海外。同人賦詩觴之。非夏少時。曾感異夢。海上仙翁。授以求風之曲。仙姬召與對弈。今日壯遊三天。舊夢可考也。

六博狂呼天上筵。玉簫吹散屨樓烟。春秋百里游秦日。陰火元虛作賦年。瑤海塵生尋舊夢。石橋山斷拾遺鞭。醉吟鯨背蛟妃舞。縹渺琴心繞鳳絃。

寄邵五堯民

第五才名大。斑駁去不忘。曾投雲母扇。分我令公香。海月三青鳥。江花一錦囊。山樓千里夢。今夜度吳閩。

風雨臨池興。停毫意轉深。神山多入袖。流水不從琴。草長江郎賦。花殘莊鳥吟。儻因濠上語。知我贈雲心。

遙同胡生。招諸子西湖雅集。座客爲張覺庵。毛稚黃。李東琪。諸虎男。洪昉思。西湖六月。烟濤萬頃。衆影一碧。綠颿紅

霧。靡靡去我咫尺。無由挂我席。我獨行平山間。豈知西湖隄上。六月赤日。猶有閒游客耶。

游人屨六橋去。馬蹠躩船無數。打紅鵝起白鷺。深翠中不知路。香風來衣上住。菱謳發紫簫度。調蓴羹進

花乳索鉛管。裂紈素。斲勁句。鄒枚聚。從朝乘舟直至暮。我持蟹螯不相遇。美人今夜散。佳期碧雲誤。西湖明日採芙蓉。花間指我曾游處。

題古松扇與邵子

五色青門事渺然。石梁吾憶聽泉年。霜毫翦取虬龍勢。袖裏常生泰岱烟。

同覺菴稚黃東琪雲卿虎男集北門周氏書齋

結友招北山。烟郊振游屐。泛柳駕已遠。高衡偶窺幕。珠榴尙垂條。斑篁無餘籀。層薨何鱗次。蘭櫂相間錯。輕塵度書亂。蛸絲半窗絡。苔草含翠烟。翻墀鮮花藥。急雨當晝昏。驚風散簷雀。游非華陰市。坐企公孫閣。雕俎忽陳軒。洗觴復行酌。紫葢正盈把。珍簞新涼薄。冰井不可及。霜簷奏余罟。傾濤馳高辨。遺骸放清謔。脫珮酬主歡。觀濠契賓樂。和鼎有蓴羹。毋忘翦場藿。

冷泉亭聽泉

千古聲還冷。無心出谷中。不雲常聽雨。入夜誤驚風。珠浦塵生久。河源路未通。神州迷禹跡。此水尙從東。

同稚黃虎男集高雲閣分賦

方剪元卿逕。同披宋玉襟。畫雲開北苑。製藻得南金。久客忘吳語。論詩屏鄭音。毛公漿自美。袁虎醉還吟。隔竹涼生笛。停樽意在琴。擊鮮非斫脰。無果羨來禽。蘆笳犀文滑。新羅琥珀沈。月高庭草暗。雲亂井梧陰。

螢起仍依砌。鴉棲欲繞林。微風先動柳。斜漢未橫參。鷺嶺羣游散。文園肺病深。稚黃從靈隱歸。一夕三賦長篇。明日病矣。流連今夕飲。轉憶在山心。

同覺庵、雲卿、虎男、過北墅王丹麓書堂。時稚黃未出戶。東琪在南屏。因柬二子。

夏雲綴長林。蘭風開高館。愉悅慕前期。有客未窺幔。如何同晦朔。一息異昏旦。結軫川上人。幽襟阻河漢。昨游既成往。今遇已就判。花豔謝故枝。桑燧改陳鑽。風雨暗求心。哀簧亦徒亂。囊穎祕靈銳。猶龍累高歎。彼美思何極。玉齒爲誰粲。對酒初未歡。張弦不能彈。

答黃帥先前輩溽暑客武林。東正叔索畫詩。步原韻。

舊恨黎關嘯古藤。牽船九曲歎誰曾。醉游天姥原無路。夢到瓊臺第幾層。夜泣鬼神人不見。曉圖雲漢我何能。毫端自有山陰雪。六月難開研匣冰。

同覺庵、穉黃、雲卿、東琪、虎男、過北墅訪丹麓。遇雨。夜集陸葦思閣分賦。卽席得七言古體。

夏雲變空霧。涼氣送城闐。聯袂無高車。訪友當及晨。極盼非川巖。十里皆市塵。榴火照牆東。竹影閉門裏。遂牽思光船。更過周口里。那知渡口鯉魚風。千山雨洗芙蓉水。撥棹相看色惆悵。曳履衝泥欲誰向。東指城門不得上。紅橋空繫游人榜。雲間詞客晝披帷。把臂還言相見遲。葛衣潦倒脫接羅。高樓碧樹無黃鸝。一笑解珮逢所思。夜堂秉燭倒金卮。張公纏鬚倡新詩。稚黃險韻誇絕奇。東琪琢句初燃菜。阿虎後出還

支頤野君蒼髯歌紫芝。高雲東園都不羈。客星那得聚良會。恆差池。白眼看蜉蝣。青衫久塵縑。名山油素約。天地汗青期。今日羣公推四子。北門有四子詩。二王二陸也。他年北墅是南皮。

貧婦詩

石榴何童童。飢雀鳴啾啾。清琴誰復張。君子已遠游。妾行不踰幃。君志在九州。空有龍鳳紋。難爲去者留。西家擊靈鼓。東鄰宰肥牛。大婦坐熏香。小婦彈箜篌。侍婢曳羅縠。珠翠常裹頭。覓我初嫁衣。零落不復收。木棉縫曲鍼。開戶羞同儔。角簪尙不完。何敢望金釧。小姑嬌我側。弱妹爲我憂。婦人故細微。慚歎無時休。

戲贈高雲主人

一笑酒家胡。鞶囊銀僕姑。看君頭上髮。如我鏡中鬚。月霧迷三里。雲衣重五銖。何因呼玉女。洗盞進醍醐。

高雲生再屬東園自和

梁父載柴胡。僊人望藐姑。波光上魚尾。花氣動蜂鬚。玉爵呼三雅。金刀辨四銖。不須多釀菊。北地有名醜。

古意十六首

戊申六月十九夜記事。

鷓鴣一以鳴。芙蓉不可託。天津瀉其波。蟾蜍久寂寞。黃鵠正號呼。羽毛半凋落。離離蝓蠖織。唧唧野田雀。八風不動籥。元氣亦無橐。白雲一朝枯。僊人足安錯。

金虎行肅殺。山樹悉衣赭。瑟風蕩瓊華。崇城闕如野。毅弩射高墉。鷹隼不能下。日月無贖贖。江河忽暗啞。

誰將乘龍淵。空望游車馬。

扶桑有紅蠶。纒絲繭如甕。采彼雲霓光。言織麟與鳳。瑤姬守明河。綠梭不能控。高懸亂絲結。若華淚交送。慮妃爲撫膺。湘君亦悽慟。燃火索蒼茅。從君卜天夢。

十年愛鮑魚。天下無臭蘭。豈知岷崙墟。惡草成琅玕。紅雲摧帝珠。有鳴非玉鸞。蠖旣麗其裳。范亦華其冠。靈夔宴早魃。玉斗酌金盤。九鼎已沈河。誰能辨神姦。

列星如垂珠。美人以爲服。惜哉無良期。丹泉不可浴。投身下大荒。空懸九幽燭。西皇猶未寐。懸圃方局促。我欲乘飄風。行空豈有足。神靈駕雲車。旋轉亦無轂。

枯桐失牙徽。元雲散重陰。一從操南風。千秋無此音。舉世不見賞。空有太古琴。軒轅何時遇。重華曠難尋。田連抽其絃。泰容忘其吟。靈祇中夜泣。蘭氣秋已沈。緗絲不敢言。何繇寫我心。

閉戶圖僊靈。出門販五嶽。五嶽不得售。僊靈何能樂。芙蓉羽衣瘦。冰鱗玉膚剝。星明不見月。無晦豈有朔。騰蛇矯其尾。奔龍皆喪角。有鳳鳴荆山。吾將採良璞。

下土正麟鬪。若木風蕩蕩。一夕墜濛谷。六龍不得上。夸父亦何愚。鄧林以爲杖。崦嵫只一山。神州亦無兩。百靈皆高眠。而我獨偃仰。早不畜雄雞。何時見天朗。

綺里在南山。彈琴見白帝。騎虎行翠微。剛風犁青蕙。神泉竇已塞。穹洞霾風閉。瑤圃困春租。芝田窮秋稅。

徵調及山鬼。翦伐盡八桂。何以薦獸藁。女羅束薜荔。珠樹無餘枝。珍果不留蒂。致書問游雲。雲將欲流涕。坎井在東道。棘林出西陌。後園樹以梅。前簷復栽藁。坎下不可飲。棘中非安宅。苦雨零我衣。酸風交相射。灌蘭無餘臭。種芝少光澤。沈憂方及晨。長歎坐至夕。九月披重裘。凝寒墮人指。北辰換樞紐。驚足正南徙。積氣俄已傾。星辰亂天紀。溫風久不至。鄒衍凍其齒。鳳鳥忽無聲。伶倫塞其耳。

長星三十丈。有孛如車蓋。太白當晝明。日輪不能大。朝聞泰山吟。暮見鬼神旆。燐火化列星。哀鴻作天籟。神京正嵯峨。河山自根蒂。雕題貢名馬。卉服獻珠貝。災患亦不生。妖祥復何害。

巫陽呼九關。空中鳴天鼓。增城非故居。上帝無寧處。橫流奔重霄。不周沒其柱。南山虎無食。牛哀夜相語。啣尾浮渡江。歎爾不如鼠。

北地有藏碑。懸識出淵水。云誰司蓋藏。鬼斧不得毀。其文既偵錯。其言復何指。柳葉辨蟲書。煌煌告人紀。天神笑下土。魯國無男子。呂尙方鼓刀。投綸未知止。關中何寂寞。拔劍亦云已。

燕趙非我鄉。衡霍久見隔。升高望四野。但有狐狸迹。莖彼篆龍芻。沫馬將安適。盛年亦須臾。前路轉見逼。還願望靈臺。蕪草已盈尺。靈臺尙不存。憔悴敢自惜。

高冠不復暖。久客無完裾。悲風緣隙來。陰氣慘不舒。日夕望大江。誰能脂我車。富貴于我賤。貧賤于我貴。



玳組何敢愛。溝壑何敢諱。椒薰昔所佩。纓綵今所畏。無裳豈忘寒。長飢豈忘味。安得樽桑暉。冰茗作春氣。  
題稚黃夢蝶圖  
誰操錦瑟怨湘靈。筆底烟絲恨草青。滿地落花春不管。花閒蝶夢幾時醒。

怨詩

高樓多冽風。仰視雁南翔。閨中擣紈素。三寄寒衣裳。朝朝縫縵縵。夜夜擣流黃。飛蓬何能理。金鏡掩容光。  
錦衾無時暖。羅帶盡含霜。前年期秋風。今歲誓春陽。巾車亦不遙。道路亦不長。何由見千里。四望皆垣牆。  
犬吠過西戶。馬鳴來東廂。深巷聞叩門。鄰曲歸遠方。屬耳每驚聽。中宵起徬徨。燈火明虛帷。促織依我牀。  
賤妾空自念。知君久相忘。

送殷大之淮上

馬銜金勒曉霜微。河上楓青雁過稀。踏遍臨淮秋草色。白蘋花裏放船歸。

寄范荆門

白馬雕弓玉轡韃。荆門專閫握銅符。虎牙吹角翻新壘。魚腹披雲按舊圖。月滿三巴歌出塞。秋高千騎獵平蕪。輕裘倘過衡陽路。好遣雙鴻到五湖。

呈靈巖座元師

兵戈搖落向江湖。別後音書雁有無。長路星霜還薊北。扁舟風雨到姑蘇。薜蘿自與青山老。絳帳空懸明月孤。回首又看烽火急。夜闌相對重踟蹰。

秋閨怨

秋風吹碣石。萬樹盡蕭疎。鴻雁寒沙外。芙蓉細雨餘。流黃機上月。尺素夢中書。之子經年別。高樓永夜虛。

同卓靈上人過顯慶東園靜室

到門園樹合。行徑石苔封。偶伴支公鶴。重聞初地鐘。閒階交細草。幽鳥過高松。藉地論心久。西闌聽暮蛩。

送王雲九之淮陰

翩翩浮雲翔。裊裊和風吹。春華日夜零。夏樹漸成帷。黃鳥鳴嚶嚶。綠草被長隄。上有遠遊人。駕言與我違。初從城東闔。邂逅君容輝。雖非平生懽。繾綣新相知。聞君別鶴唱。惻爾重傷離。願持盈觴酒。申以河梁詩。征車何迢迢。轅馬聲參差。朝游大江濱。夕宿淮水湄。行驂無留軌。離瑟繁哀絲。手握尺素書。問子歸來時。

吳門文初瑞初子潔彥兼四先生過訪家君東園小集草堂有述

朝日出東園。寒輝燭晨霜。高士遠及門。蕭辰恣游翔。開軒理瑤琴。繁音動宮商。白雲停前除。冷風襲樞窗。良晤追古懽。惠言展衷腸。山泉充酌斟。郊蔬實圓方。清言發四座。浩歌激中堂。薜荔旣生色。宴笑亦未央。同心各異居。會短別阻長。佳期不屢至。蠶婉莫暫忘。含情欲有贈。濡翰增慨慷。

同石谷子、修齡翁、過朱子山池。

捲簾山翠滿樓看。勝地幽人問古歡。涼雨未成風轉急。秋容將老氣先寒。

重陽前六日同修齡翁、石谷子、飲朱子草堂。

山樓空翠入窗紗。籬逕秋深未見花。把菊尙遲高士會。持螯先醉孟公家。驚風捲葉收殘雨。斜照穿林點暮霞。勝地流連共心賞。柳塘歸路已棲鴉。

題石谷雪圖

風壑暗泉清。山庭曉更明。夜來松雪重。猿鶴凍無聲。  
雲海都未開。鴻濛幾時破。空谷閉門人。知有袁安臥。  
瓊樓生光芒。銀海無昏暮。人從瑤島來。手弄三珠樹。  
仙人掃琪華。鳳團烹石鼎。獨鶴立山亭。飛上峨眉頂。

暗雨離思

急風初變雨。晚氣不開林。今夜綠池上。經秋紅蓼深。雲來難到夢。草長欲驚心。莫以前期改。空燒玳瑁簪。  
秋夜同稚黃、子鴻、虎男、過陸蘊思、不遇、因抵東籬草堂看月。

燈火亂平川。昏鴉市柳邊。千門同霽月。深巷閉寒煙。素女將窺瓦。洪崖未拍肩。蟾光莫西下。座客欲無眠。

贈莫大雲卿

高雲閣下聚樂·適逢  
主人降日·索詩

舌在誰言老。弧懸莫問年。還將射虎箭。聊爾伴鷗絃。夜舞銅鞮曲。朝歌寶劍篇。牛衣暫相對。先贈祖生鞭。

新秋想毛稚黃夜吟處

江雲想奇服。石華夢空島。閒塔苦吟處。一夜生秋草。碧雞鳴瓊崖。天馬出東道。朽壤蒸金芝。豔澤自美好。山川久無言。丹梯問誰造。靈泉倘有窮。雲霞亦枯槁。默坐索鬼神。鮮風洗吾藻。絢彩非掩素。曲輪不厭筭。文心在天末。麗景入奇抱。銀漢爲君傾。蟾兔爲君老。

答稚黃與暉子說秋氣

勞歌開北牖。彈劍問東游。極目一千里。長天不斷秋。夜蟾知有夢。野蕪說無愁。薜荔西風裏。空山憶敝裘。

越山

絕壁繫蒼藤。殘碑弔六陵。越山逢夜雪。鶴語憶堯崩。

觀潮

何處紅樓聽玉簫。銀蟾不見桂花遙。海神尙作秦時夢。枉恨移山舊石橋。

雪光雲線下空雷。點鷺翔鷗白練來。二十三年無勁弩。天吳纔放海門開。

和稚黃九日詩

重九不置酒。不泛菊。紫茱絳囊。徒喜其名。嘯侶無山水之適。秋堂偃仰。把詩自勞而已。乃有毛君。與予同懷。獨立暮雲。一嘆秋色。予悲其聲。

應。鏘而

客館單衣冷劍囊。故園天畔路蒼茫。插茱不愛無家紫。把菊難逢載酒黃。五夜獨吟雙鬢雪。三秋同病六橋霜。知君縱有登臨興。未忍憑高弔鳳皇。

題稚黃晚唱詩八章

讀毛公晚唱。有斗壇蟪蛄焉。鶻蓮華峯。老子蒙沙。憚子說秋靈氣語。韋策造化。抽其怨思。智騁奔霄之轡。翔乎閩風之苑。沐浴八海。常游髮層城。上采瓊華。下挹瑤井。珍怪極矣。蓋以九州不足游。五嶽不足涉。夫拘墟者。刷駕籬壁。而削迹。顧非遺九州。廢五嶽。而獨放乎殊域也。絃索曠僻。以自快也。響之安所之也。籬然。而毛公。鹿場。且不及問天地升降。有五嶽九州也。而又焉知奔霄之。晚唱云者。之自量也。彼飛。遠矣。毋乃令人望海中神山。何足以麗之。見。而疑之也哉。當其得意命。連類遠引。奧險。創無象。即稚黃不能自解也。因繫。以詩八章。解稚黃之所不能自解者云爾。

神鋒如雪正崢嶸。一洗新愁五嶽平。海底潛蛟應起舞。江湖都作夜吟聲。步虛聲杳夜如年。霧閣微聞碧玉絃。夜叫九關騎北斗。壺中猶有未開天。桂葉茫茫刷絳河。瑤姬無力度金波。水晶盤裏初相識。曾問蟾蜍歲幾何。何處紅雲十二樓。空教靈鵲怪來游。醒時不記三天事。自剔殘燈畫女牛。翠濤香海不生塵。游戲神霄劫外身。夜臥綠房窺色界。蓮華能闊幾由旬。天柱風翻墜帝臺。僊人無地散蘆灰。煙沙遮斷函關路。不許猶龍紫氣來。

殘月何心弔夜泉。芙蓉偏愛楚江煙。秋風杜宇還啼血。紅到千林亦可憐。  
掩卷秋生牝壑風。屋梁雲氣忽成虹。懸帷晝睡連天雨。還在銀河舊夢中。

贈朱弁上北游

懷寶知垂棘。奔霄起渥洼。籌邊漢卜式。任俠魯朱家。趨府人還少。爲郎鬢未華。君行御溝上。爲問上林花。

贈莫十三漢農

莫君嗜古。精于天文。能驚外國使。能考  
璇璣玉衡。而終于不遇。故作詩贈之。

君家西湖濱。厭看湖上山。身依海鷗宿。心與天雲閒。口吟五噫西出關。脫帽自挂蒼梧間。偶然登燕臺。洗  
足御溝水。緼袍蒙茸一草履。金貂紫駟君勿喜。倒誦蟲書三萬言。侏儻笑擲番王璽。重譯曾驚外國使。諸  
侯盡倒蘭臺屣。既鍛上林羽。又轉桑乾路。囊破惟留五嶽雲。鶴飛還想三珠樹。滿腹皆象緯。纏衣悉煙霧。  
握尺量舜管。執杓考天步。流霞未肯酌。熊蹯亦不茹。還將柵葉補秋雲。柳栗橫空萬山去。漢農自貌杖  
笠獨游圖。

同毛稚黃在巢青閣逢余體巖鍊師卽席爲圖題扇

我逢余鍊師。古杖方竹根。雙眼鑄日月。一身浮乾坤。座中談參同。毛子默不言。借爾采藥劍。叩我元關門。  
俄頃遍帝庭。半榻通桃源。戲剪吳山雲。松風鼓游囊。墨華墮海嶽。元氣與君酌。手中齊紈裂。明月森然靈。  
兩生秋壑出。門揮扇過前峰。峰頭笑指蘇耽鶴。

寄陸泰來嶺南

草殘鄉思後，葉落授衣初。八桂三秋夢，故人今夜書。飲江愁孔雀，觀海祭神魚。椰酒誰同把，青袍涕淚餘。

夢陸秦來

玉蘭枝老鳳無羣，我夢隨風度海雲。吹到羅浮猶未醒，梅花嶺上忽逢君。

送洪昉思北游

贈爾芙蓉劍匣霜，一聲驪唱晝雲黃。纔翻樂府調宮羽，又戲金門和柏梁。白馬沈秋歌瓠子，黑貂殘雪度黎陽。遙知鼓篋初觀禮，綿叢諸生欲拜郎。

頌酒

趙子家有醇醪。餘二十年矣。暇日腦余。及雲癩。似穀。玉壺承杯。座客盡驚。光晶爽。味純腴。即竹葉鬱金。未足方其美也。戲爲詩贊之。

趙子飲我酒，夜翦園中韭。一傾桃花漿，金莖忽盈口。吏部方拍浮，參軍將承槽。瀛洲厭玉膏，西域廢葡萄。元珠與赤瑛，晶光欲相盪。流霞瀉明月，絳雪灑仙掌。鴟夷賦大腹，帝女薦其靈。沈藏二十年，人間無酒星。屢舞更揚扨，扣劍歌莫停。主人肯長醉，客亦不願醒。

題毛稚黃新詞

梨花穿月夜無痕，柳絮蘆綿大地溫。極綺豔時翻有恨，最悲涼處亦銷魂。

吳山高曲送友北征 錄一

吳山高，江雲涼。楓葉正綠，綠草不得黃。葛衣淒風，布被晨僵。六月積雪盈寸，八月安能無雨霜。鷹隼朝飛。

夜有鳴蜩。北地先戒寒。誰爲公子裳。我垂翅於東隅。念彼扶桑。僕夫絕糧。車無服箱。劍無精銛。何況送我友朋。何況送我友朋。孤蓬上征。趨乎遠方。彈彼離琴。琴不成聲。作爲短歌。歌不成章。

飛龍曲。題謝文侯扇。贈潘子。

蛟宮照夜有明珠。笑展張公雲霧圖。水底奔雷驚夢醒。半天風雨見龍雛。雄雌雙舞攬雲衣。朱火偏驚劉洞微。吟罷海濤雲不散。更翻新曲上金徽。種花僊子愛春烟。寶扇朝窺玉鏡前。騎鳳簫中遲夜月。乘龍雲裏待佳年。冰鱗雪甲洗秋雯。曉電常呼霄漢羣。肯以泥蟠笑黃鯉。坐看尺木起風雲。

裂扇

鐘鼓東門亦誤驚。可憐擲地已無聲。谿山破碎靈烟散。一夜東吳墜墨精。

自嘲

放筆心通造化師。何曾山水見鍾期。誰知玉碎方流盡。還比昆岡抵鵲時。

綠蕉

坐久燈花暗。風樞度雨聲。綠蕉窗外淚。今夜爲誰傾。

菊



碎剪紅雲照綠苔。倦吟人醉夜光杯。隔秋記得看花處。豔色亭西最後開。  
中酒聊從石上眠。葛巾零落補秋烟。籬邊忽見南山色。又是柴桑把菊年。

題石谷畫看梅圖

竹外橫烟松上風。攜琴溪岸板橋通。不須更放孤山鶴。身在寒香夕翠中。  
柳路溪風拂面寒。幾枝晴雪傍簷端。暗香瘦影分明處。把酒山堂待月看。

題畫

海客乘槎事渺茫。蓬萊水淺已千霜。此中尺幅藏東海。那管揚塵與種桑。

# 甌香館集卷三

題雪山圖和陳其年韻

庚戌盛夏。吳棫吉持其年所贈詩屬。索予畫雪山圖。因取其詩。依韻和之。時陳髯方挾雲耶北去。念之且嘲之也。

笑擁如花人。橫鞍大梁去。諸侯倒屣繁臺下。酣歌醉舞無晨暮。我來問所歡。碧雲空悠然。吳生擎扇向我笑。好游髯客忘歸轡。爲君抽毫扇底掃風雪。欲君懷袖六月生寒煙。

## 谷口歌贈友

鮮甫洗蘭叢。谷口無纖塵。翡翠戲北牖。麋鹿結南鄰。絳氣沉空霄。白髮變昏晨。松風過澗綠。奔響趨龍鱗。想見桂樹間。猶有義黃民。山情愛初暉。波影銜斜曛。何必上五嶽。沐髮瑤水濱。乘卉契獨娛。涉野常懷新。攀鴻昔已緬。采露今始頻。長歌繼摩詰。一笑桃花春。

## 贈袁中江

燕子來時客未還。又將騎馬上燕關。客窗尙有分雲手。因寫東吳雨後山。

## 玉樹山堂

春雨中望見鄰園。玉蘭將開。戲爲點墨。

凝寒未減怨春遲。曉步山堂問柳絲。忽見玉蘭齊破雪。始知春到已多時。

## 吳門王勤中過訪

故人停畫舫。款我水雲屏。執手卽狂喜。但云相見稀。病添新白髮。貧戀舊青薇。明日留尊酒。還來坐釣磯。

秋暮同張程諸子蕪城水榭分韻得花字

秋氣銷殘暑。烟郊看落霞。龍垂江路雨。蟬噪水庭花。畫舫連陂出。漁罾柳岸斜。從君問隋苑。芳草夕陽遮。

題江帆圖送彥吉之長安

長劍何能戀故園。手搴芳草賦銷魂。誰言剪水吳刀澀。卻袖江雲入薊門。眼底浮雲故國迷。又從天外聽鶯啼。曉來轉恨江風急。絲柳蒲帆盡向西。

秋雨未歇在高澹游書齋觀宋元名蹟

爽氣生秋衣。層陰停秋館。雨侵蕪絲重。風捲竹林偃。幽情發珍圖。碧嵐凝不散。窺圖如得路。俄已涉千巘。目入蒼翠交。汗漫不知返。忽繞羅浮烟。微茫送楚畹。朗如鮮霞開。黑若松徑晚。杳然九曲盡。惆悵天地短。今古列几案。擬議出寸管。但與靈匠期。無嗟昔人遠。

王山人山莊早春圖

昔惠崇。郭熙。皆有早春圖。稱爲人間名迹。烏目山人此卷。雖宗

風氣。至於設色之巧。極爲淺澹。愈淺澹而愈見沉深。而不知以空靈淡蕩出之也。若用色渲染。一入渾厚。則非早春景色。惟澹極而沉深。蓋能運其神氣於人所不見之地。其經營苦心。至此無餘憾矣。

陰厓寒未解。幽磻尙留冰。昨夜條風緊。嵐烟翠幾層。

出谷寒泉明。遠岫春雲接。密樹不知霜。猶剩殘冬葉。  
板橋橫荒谿。鷓鴣閒可數。春波猶未到。半露黃沙渚。  
青開凍壑痕。綠轉枯楊色。腕底放春來。不借東風力。  
練界千灘雪。晴開萬樹烟。山陰無剩雪。誰放剡谿船。  
竹樹亂春禽。人家蔽翠陰。騎牛出谿口。烟柳過橋深。

雨夜酌酒與莫生兼懷邵馮二子

華燭照玳筵。凍雨響空牖。脫帽把金卮。高歌不拊缶。我來正搖落。佳期閒良友。鷓絃空操別鶴音。龍頭自瀉葡萄酒。西林馮君慷慨人。東陵公子雅絕倫。大兒文舉與我交。最親酒酣爲言二子意。氣如高雲何爲。惓生黑貂風雪同飛鶉。江關十載鬢多苦。辛陶朱金盡劇孟老。著書豈療虞卿貧。去日江花正啼鴉。今到吳山草如雪。停雲咫尺未可攀。散髮松陰三歎息。翠微寂寞紅蘭凋。淒斷旅魂招不得。江城烏啼夜向闌。缸花自落雙銅盤。碧紗烟中人影寒。漸聞風聲浙瀝敲井幹。不眠吳客摧肺肝。

湖上別朱朗詣

海風鳴枯桑。白日下西陲。征人策駑馬。躑躅城之隅。我馬不遑留。與子當睽違。去路何迢迢。攬轡立踟躕。豈無夙昔好。千秋非所期。豈無平生親。金石將見疑。榮名人所慕。明義衆所訾。荷子衷眷言。脈脈中心知。

未能致區區。何以言乖離。白雲悠然歸。天風來御之。遵途有徂轍。馳景無停暉。山川詎云遙。齊願寧久睽。匪勉嗣徽音。慰我長相思。

阻風沈子齋中憶南屏

咫尺荅谿路。操舟不可行。相思今夜酒。并入故鄉情。宿鳥窺燈影。幽篁散雨聲。三秋江上札。曾否寄南屏。

雜感

狗盜皆稱客。今誰數孟嘗。朱門正歌舞。白帽自風霜。恥作佞官態。徒噴鼓吏狂。從來事高潔。豈忍更褻裳。奇服誰言好。年年補女蘿。傷心成酒頌。玩世託琴歌。器小求知急。名高見忌多。果能傾一顧。何必妒雙蛾。輕薄看時輩。誰能問古驩。兔狐猶念類。脣齒自知寒。駿骨酬千里。翳桑受一餐。寄言天下士。口口在彈冠。斷簡留秦劫。無糧說禹餘。琴寒桑扈雨。金養范公魚。對案慚妻子。呼門畏吏胥。朝生當暮死。不待歲云除。

後雜感

采藥終孤往。丹梯未可求。此方皆大澤。吾地少靈邱。蝦菜三春酒。鶯花一草樓。知無買山力。爲我謝巢由。桑柘今安在。雞豚願已違。衰門親舊絕。失路友朋譏。黔竈終燒研。雕雲不製衣。早知慚歷齒。何事厭輕肥。長夜誰同舞。荒雞不肯鳴。雕蟲心自悔。折翼夢猶驚。絕險觀奇士。通都聚客卿。豈因吾髮白。早晚報河清。編花成麗句。斂草就霜紈。瘦骨難因熱。孤懷只向寒。奇書牛背讀。妙繪虎頭看。尙有千秋在。風簷一整冠。

守歲南村

漏向歌中盡。家餘物外貧。燭花銷蜡臘。杯酒換冬春。夜鳥孤村雪。寒松隔世人。辛盤照華髮。兒女暫相親。

壬子初夏戲學曹雲西

石壁無雲澗路空。荒荒竹葉夜來風。心遊古木枯藤上。詩在寒烟野草中。

陽羨贈江西宗赤霞

諸侯客館已蕭然。游囊誰分月俸錢。爲愛銅官朝翠合。蛟橋長繫孝廉船。筆底烟霞未肯貧。客山攜手醉花茵。他年倘過章門路。沽酒江潭是故人。九疊屏風最上層。難將空翠染谿藤。知君家在廬山麓。天半香爐到未曾。一片蘆烟憶斷鴻。還家三過白蘋風。篷窗若展烟江看。帆影翻疑在扇中。

時余以煙江圖贈別。

九月南田草堂送石谷應樸園周司農之招

我在南田蔽綠筠。錯刀天畔寄愁頻。三秋叢菊花邊夢。半繞桃源磯裏人。天光如練賦心閒。空翠長留縹渺間。散作秋雲正西去。墨花應滿秣陵山。荀家鳴鶴又南飛。天下王郎見亦稀。此日周公在江左。更呼君認舊烏衣。席門蕭寂閉荒苔。明月秦淮首重回。爲爾空庭多種竹。雪中還望刺船來。

壬子十月與江上笄先生、烏目山人、同聚西郊。泊舟夜談。與江上翁合成此圖。相對笑樂。但石谷子從壁上觀。得毋不戰屈人邪。

古松亭亭高出羣。一雙鳴鶴夜深聞。幻霞竹樹扶疎甚。挂向山堂生白雲。

枯木竹石

老樹如奇士。修篁似美人。嶽嶽一片石。相伴歲寒身。

松風嵐翠設色古淡。不爲濃麗。雨氣韻自足。此趙吳興神境也。

硯北移雲不動塵。花谿啼鳥碧嵐春。於今何處尋黃綺。羨爾空山獨往人。身在松濤嵐翠間。笑看野馬幾時閒。自從劫外留眞想。何必寰中有此山。

秋江雨泊石脚平橋。秋林紅葉。離披有致。一徑穿林而上。古岸相接。遠樹迷離。鎖斷烟村。略得遠勢。荻蘆平灘。泊一漁舟。愈見閒冷。

荻花兩岸橫孤篷。翠壓洞庭秋色濃。斜風吹烟雨脚亂。零落隔江三四峰。

題畫設色最冲淡而沈深。浮氣盡斂。不爲綉闌。此成風妙手。非時史所知。

石壁垂蘿古洞春。奔泉濺瀑下瑤濱。尋幽別有雲深處。不種桃花誤世人。

壬子十月江上笄御史同石谷王山人。浮舟毘陵水次。盤桓霜林紅葉間。屬王山人爲圖。各賦詩十

二章。以志勝事。

吟秋詩興與誰同。眞想長留霜樹中。爲愛晚霞紅更好。船頭欹帽受涼風。  
對景都忘水國寒。獨吟篷底破吳紈。一秋閒殺千林色。盡日無人此地看。  
一曲平岡望轉深。霽光偏射日西林。誰能繫卻斜陽影。不放千紅到夜陰。  
坐看霞標想赤城。曾無塵事更關情。還疑碧落仙人宴。一片朱衣絳樹明。  
踏歌聲散一天秋。隱隱瑤笙吹未休。總是毘陵城畔路。望君游處是丹邱。  
蘋洲曉泛白雲涯。又過烟灘傍柳絲。人道仙舟無覓處。荻花風裏夜吟詩。  
青油步障未應開。遮斷車塵少客來。正是楓林搔首處。蒲葵題扇莫相催。  
謾使秋容易寂寥。珊瑚撐日護寒飈。應知眞宰非無意。千樹圖成一夜凋。  
十日晴和霜雨遲。瑟風夜半起寒枝。從今移入鵝谿絹。白帝青娥那得知。  
千人辟易讓王郎。天地眞容我輩狂。鎮日同吟殊未厭。短亭臨別又連牀。  
葛屨天寒臥草萊。先生攜鶴下蒼苔。林間得句偏思我。霜路頻呼踏月來。  
蝨尾銀鈎書自聖。輞川淇谷畫通神。莫將此際蕭寒景。說與塵凡肉食人。

題石谷先生毘陵秋興圖

壬子之秋。同年友邀余過毗陵。館於家園。勃勃未盡。山王子石谷之至。連床夜話。討論今昔。四十餘日。興勃勃。未盡。山王子石谷之

澄江。途俱告歸。石谷還虞山。余返棹京口。是時維揚李給諫。徘徊於禪房仙觀。於明春同聚焦巖。期會正遠。因維舟河干。絕賓朋。恣遊賞。徘徊於禪房仙觀。於



與主人知也。一夕。放舟徜徉。見堤上秋林。石谷指謂余曰。此真畫也。先生賞之。霜楓紅葉如熾。青松紫煙。白榆烏柏。五色相鮮。高下俯仰。參差雜沓。不可名狀。復有叢篠枯槎。遠近互相掩映。位置若人巧者。石谷屬石谷曰。鱗化工神妙。當與爭奇。先生亟為我圖之。右丞大年。不足事耳。石谷欣然呼毫。鱗化工神岸。似造物者惜此秋華。一片丹楓。竟移奪於素間矣。如昨。成此固時序之所不能侵。瀧。而霜雪之所不能剝。尤可寶也。南田憚子聞而異之。就籬窗對景展圖。酒稱賞。無。章以紀斯遊。即相為。唱和。併敘其狂興。如此。

丹徒管重光在辛

坐愛霜林眼倍明。中流放舸絕逢迎。拾來千尺天孫錦。攜伴詩囊着處行。  
 從來迂叟戀山谿。一片秋心未肯迷。十日一山五日水。孤舟不離板橋西。  
 長林迤邐石梁橫。雁影當空漁火青。分付長年須早起。明朝鼓棹入葭汀。  
 紅林古岸影重重。每到斜陽色更濃。夜泊不知明月上。誰家綺席動歌鐘。  
 毫蹤一試一回新。不數縱橫寫富春。顏得江南秋色好。鷗波摩詰是前身。  
 方平今作謫仙人。筆底烟霞絕世塵。寄語蔡經休錯愕。麻姑一會是羣真。  
 山樵作畫與貞居。為是移家載道書。我亦華陽稱外史。虛舟泛泛復何如。  
 十年棲遁近漁磯。霜葉紅時坐未歸。說向王生覓丹訣。還須料理薜蘿衣。  
 拾遺清興自無雙。來訪王郎看大江。為道焦公山更好。遮留直許到秋窗。

十月江南風未寒。吳山楚水望漫漫。恁來青眼篷窗底。只向毘陵兩岸看。  
拋卻扁舟好杖筇。虞山茆嶺又千峰。歸時霜葉紅於火。肯許追尋方外踪。  
愛爾南田學隱淪。草衣不是避秦人。他年子晉吹笙處。呼我仙源一問津。

和作

大倉王時敏烟客

篷底秋光盡日憑。更兼驄馬下毘陵。霜高月落烏啼後。翠幃丹楓擬右丞。  
李郭同舟已合仙。京江勝事忽喧傳。耄昏疲曳西田老。也放襄陽詩畫船。

又

大倉王 鑑元照

城中翠館沸歌鐘。城外霜林葉正紅。拋卻豪華對幽寂。先生高跡許誰同。  
輞川畫筆少陵詩。泛泛輕舟信所之。閒與沙鷗訂盟處。莫教笑我不追隨。

柳谿漁隱圖

亂柳垂谿陰。山雲發幽賞。釣罷未收綸。高歌滄浪上。

山樓曲

傍碧山。臨清潭。脩篁瀟瀟。蕙蘂相交覆。中有小樓岑然。窗櫺洞明。憚所寢。其

而無其端。倘悅盡冥。疑有所遇。而不可究詰。紛紛襲襲。如亂絲相纏。其感。惕曰。怨思。託纏綿之思於其音云爾。

空樓蔽芳樹。竹葉落翠羽。瑟瑟琅玕滿樓霧。青青樓上山無數。湖風吹山山作雲。濕雲含雨連山度。我思飄緲雲中君。乃在十二峰間漢皋路。貽我瑤華雙珠珮。流光灑灑空靈遇。金銀臺冷芙蓉衣。弱水如烟散霞圃。星飛井底海水乾。去天一角望蛇盤。手綰羅襦非合歡。雌龍怨澀冰絃彈。綃文亂染紅闌珊。嬌花泣露金井寒。轆轤聲轉煙蘿塢。夢送春雲過江浦。天雞喚夢雲不知。滿樓濕盡山樓雨。

初冬過荆溪訪潘元白。便移舟西沅。從南山一帶看楓葉。同游爲天台石枚吉月陵友雲元白髯浮屠。

我從蘭陵來。呼友荆谿市。荆谿主人愛看山。牽船脫帽西風裏。千林十月不見霜。平隄碧艸浮魚梁。蘆花冥冥水淺淺。楊葉索索烟蒼蒼。潘子揮長牋。篷底坐焚香。四座分醅酥。傾杯無酒漿。江東步兵自行炙。鄴下才子調銀簧。舍棹入翠微。扶石憩山館。石林崩灘路不同。高松無人鳥相喚。前坂穿稻畦。樵徑忽下斷。古藤搖寒柯。紅柏落將半。榆風裡露變殷紫。杉陰檜枝翠交亂。幾時飯黃精。直上銅山巔。一爲鸞鳳音。萬壑皆泠然。日夕下蘭坡。高歌齊扣舷。手拂冠纓弄魚鳥。葭汀空影相澄鮮。漁網衝烟沙岸直。水光盡作明霞色。回看松路起昏鴉。雲暗山門衆山黑。

題立雪道人蓑笠牽牛圖

不作長沮非荷篠。牽犁只道南陽好。阡陌旣已平。壺漿不能飽。夷稗正豐茂。良苗漸枯槁。將耕吳山烟。爲

我種瑤草。惡木肯息陰。龍芻豈同阜。不風不雨常帶笠。無昏無曉安知老。當時叩角是何人。側身一望乾坤小。

壬子冬夜同筮侍御在辛。泊舟西郊。觀烏目山人雪圖。因題。

北風忽起凍雲低。篷窗壓雪兩岸迷。只道牽船過剡谿。孤舟還泊西城西。

和作

丹徒筮重光在辛

黑雲墮地天欲低。雪光照夜歸鳥迷。但愛月色印前谿。山居笑殺唐子西。

又

宛陵梅 清澗公

墨光盡白寒雲低。千山萬山山路迷。我欲相從問剡谿。故人家住西山西。

曉山欲雨

李營邱學右丞一格。與他本迥別。石谷此景。於象外會其神趣。真古人之再見也。

暗谷層崖雲不開。灘聲樹色滿庭隈。墨池應有潛龍起。忽見晴窗風雨來。

擬宋人桃柳圖

花想鮮霞未散時。葉遮黃鳥曾啼處。裂開明月寄華春。縱有東風不吹去。

嘉禾道中

東辭滄海鹽官邑。挂席嘉禾二日程。一路青山三百里。白雲都是故鄉情。

梅柳

春風吹柳柳絲黃。更有梅花滿路香。客去主留湖月白。來朝依舊醉春光。

樹石

墨石若醉立。老樹欲吟風。秋堂雲外看。清籟起寒空。

仿子久畫於無意中得之并題

古人有子久。今人無子久。子久不在茲。誰能知子久。此不作子久而甚似子久。腕中信有鬼。真宰不得守。寥寥千載下。鍾期竟何有。

松壑聽泉。松壑聽泉。石谷學李晞古法。晞古圖境靈險。發筆得峭爽勁逸之氣。時俗學仿。大都畫肉遺骨。使驛驢氣盡。願借斯圖。一是正之。

危崖奔泉風雨至。藤花松影吹滿地。攜琴聽泉松石根。濕盡衣巾皆空翠。

斷橋聞笛

烟水蒼茫蕩畫橈。石欄堤畔望寒霄。一聲玉笛千秋月。零落梅花十二橋。

春愁

南浦草連天。春聲到杜鵑。花含故宮雨。柳帶六朝烟。蜃氣方連粵。江雲不到燕。如何此時夢。零落滿吳川。  
從家君及諸道侶訪河渚鄭孝直兄弟有贈。

青楓白露正高秋。法喜還從汗漫遊。十里疎篔臨鶴樹。一谿明月帶漁舟。桃源采藥迷仙洞。潁水牽牛飲上流。環堵蕭然塵世隔。招尋轉自愧羊求。

上堆山先生

典型故國仰靈光。衰鳳吟歌過楚狂。青史新書陶處士。蒼生奮頌漢循良。閩天雁去音塵杳。易水人還夢寐長。風雨十年悲失路。可容几杖侍茅堂。

和宜休居詩

搖落秋風作楚吟。梁谿高臥到如今。淵明門徑思楊柳。中散琴樽問竹林。夜月悲涼湖海夢。空山窈窕薜蘿心。十年流水無同調。莫向人間覓賞音。

風蓮戲魚圖

萍風將散綠。香氣欲成霧。美人采紅蓮。曾過南塘路。菱絲翠相結。荇帶青未開。忽聞跳波聲。儵魚泛空來。

畫江山停棹圖和韻

夏寒江上放晴遲。風月流連倚棹時。灑墨忽隨天雨至。移山不待曉雲知。重窺烟路曾遊地。笑誦摩厓記勝詩。花下披圖把盃看。暗潮汀外尙迷離。

月出歌和龔琅霞作

西蜀李太史寓齋前。有繡毯一本。花開。招琅霞龔孝廉飲其下。時當三五。圖景交光。千花並色。花不可狀。以月得之。因作月出歌。

千載此花月。幾時相盤桓。月不待花白。花從天上看。金波瀉樹枝。未安眼邊瑤。海生微瀾。花枝朦朧淡。如此更無月色在花底。宛轉春風送素娥。月華爲爾牆東起。惆悵李太史。歎絕龔琅霞。此時晶光霏微。惟見月半壁。坐看天無涯。太史大笠不覆首。倚石離披露兩肘。摩娑高雲月在手。笑弄蟾蜍呼北斗。倒挹天漿注瓦缶。仰問青天知我否。須臾衆影風中見。忽如翠袖開紈扇。百結流蘇挂夜珠。一隊霓裳舞春殿。吁嗟真宰賦物已太勞。太史文心亦千變。雕鏤神力爭天工。移情于此生留戀。烏鵲知未來。桂枝安在哉。華林瓊樹今已摧。尋常花木還高臺。有酒在深杯。如何不飲空徘徊。琅霞吟未絕。太史方擊節。遼城羽衣不能語。關山玉笛聲初咽。賦就應來巫峽雲。座中還想峨眉雪。

湖上草堂送友因寄家書

草淒淒。風嫋嫋。越客花間騎驪夏。柳未青。蘭滿牖。贈客折蘭不折柳。蘭風吹雨上征衣。紅亭紫陌縱金鞮。百草怨方驕。故園今□□。鳳孤游。鵲朝飢。春來西嶺無青薇。我有書一握。燈前淚濕藤箋薄。請置君行筇。爲我寄東郭。靡蕪一夜滿江城。游子車輪生四角。山丹枝欲然。條風吹綃幕。梁鴻適越非得已。主父西游正寥落。江水去悠悠。吳山雲正愁。脫此鷓鴣裘。且醉吳姬春酒樓。玉壺青絲酌馬乳。吹簫獨按漁陽鼓。游子不返願。揮鞭直向長干路。風嫋嫋。草萋萋。我望白門西。江上桃花沒馬蹄。

送周翼微入蜀

滿眼風塵一劍囊。錦江難洗陣雲黃。豈知岷嶺蛾眉上。也有田栽海上桑。  
邊烽天外未休兵。牧馬秋屯白帝城。客路金笳荒戍月。斷腸不爲聽猿聲。  
翠削天梯劍閣寒。淋鈴曲罷憶征鞍。一夫已失當關險。不必重歌蜀道難。  
小鳳桐花近有無。何從開國問魚鳧。吳儂只愛江南好。因寫吳山送遠圖。

還山口號

風送歸帆半夜潮。客愁鄉思一時消。轉因家近心偏急。十里翻如百里遙。  
柳路人從北郭回。燈前兒女笑顏開。夜妝小婦添香粉。暗展菱花喚不來。

古木流泉圖

眞想來空襟。忽與古人遇。我不學雲林。亦有雲林趣。

寫生題句

吹罷瓊簫咽鳳塵。粉痕暗減鏡中春。低垂翠袖紅妝側。舞倦龍綃一美人。

哭呂穗九

枯桐塵滿總帷深。舉世何從問賞音。獨拊靈牀魂在否。聲殘流水哭人琴。



拂拭鵝谿剪素紈。書來相索待加餐。尙餘一幅圖番馬。留作他時挂劍看。冊中無畫馬。屬予呼

難覓金莖露一杯。使君游宴曠懷開。笑看點墨淋漓處。曾比枚生七發來。病中時索予筆墨道興。

牀前相對一開顏。瘦骨嶽嶽几案間。半壁峻嶒邱壑在。病深猶愛范寬山。病亟。猶以兼金覓石谷山人畫。溪山大幀懸壁。

落花戲魚曲

趙承旨畫落花游魚圖。題云。溶溶綠水澹如染。風送落花春幾多。頭白歸來舊池館。閒看魚泳自漚波。延祐七年三月六日、春霽。溪光可人。乘興作落

花游魚圖就。賦詩其上。殊有清思耳。此幀已歸廣陵王氏。不復可得。癸丑、予客西泠。往來湖濱。蘋蘩荻港。綠隄花岸。可以澡雪塵襟。馳盪藻思。每當風日暄和。碧

澄波如鏡。散紅如霞。沙粼粼。雲瀾瀾。菰蒲相加。繫春風兮。于水之汀。雲之涯。藻動不見底。荇帶清可憐。儵

魚游其間。願得惠子兮。從我乎濠上之觀兮。

訊半園唐雲客先生病起

繞床芝朮空瑤琴。獨枕縹緗伴古今。夢隱烏皮桂花冷。半簾秋雨畫堂深。路徧蒼苔晝掩關。一秋心與碧雲閒。白頭今見相如渴。不看芙蓉憶遠山。

曉登初陽臺遠眺

晨興涉林麓。遵路上岑崿。攬衣盤峻嶒。遊目恣寥廓。霽靄出層巘。霜氣冽萬壑。賞遇新謠發。境觸真相作。窈窕滄洲雲。迷離入叢薄。霧散岸葦出。初辨漁艇泊。遙鐘隱翠峭。亂水浮丹閣。烟暉近遠變。霞彩往來數。

江濤嶺上明。帆影樹中落。離離見海日。曖曖照山郭。宛轉歸徑間。娛心滿晴屨。

雪草山茶

冰池原有草。雪砌尙留花。羅浮無夢到。斟酒看山茶。

蠶婆豆花

麥隴輕寒桑火遲。豆畦香滿過春期。花開豈爲吳蠶密。錯認天公愛繭絲。



# 甌香館集卷四

天修季君招飲張樂歌自製新詞演柴桑翁歸隱事激揚高風形容道妙填詞家淫豔餘習洗滌略盡因製曲十章

賦罷歸來醉玉壺。閒鷗身世任江湖。紅塵十丈長安路。柘館清歌似此無。  
醉後閒呼鸞鶴羣。北山何用著移文。知君高志輕軒冕。游戲真如出岫雲。  
聽歌身已入谿山。能使心餘物外閒。洗盡詞家舊歌板。不將豔曲落人間。  
移塵不是舞霓裳。樂府新翻換羽商。莫使春風怨梅柳。笛中吹遍菊花黃。  
畫屏銀燭引清謳。高士分明把菊游。卻怪朔風催雪夜。九華筵畔恰逢秋。  
曾是柴桑漉酒巾。難將優孟寫閒身。忘言真有南山想。疑殺今宵度曲人。  
聞歌偏在亂離時。我愛君家歸隱詞。旗亭他後徵歌日。不用當筵舞柘枝。  
莽莽乾坤醉未醒。停杯岸幘數殘星。笙歌轉眼繁華度。都向蓮華漏裏聽。  
鳳管獅絃欲遏雲。紵歌梵曲自紛紜。何如乾闥婆天樂。醉客當場總不聞。  
默然何必問維摩。琴韻能令大地和。小玉聲中君得路。新詞微妙總伽陀。

晨風飄岐路

策足愛通津。誦詩跂周行。隨時履多艱。枉轍非所望。極目睇寒雲。寒雲一何長。飄風衝地起。晨露沾帷裳。黃埃蔽前陌。飛蓬自飄揚。南轅紆北軫。豈念河無梁。纏牽累千里。志士多傍徨。奔車古有戒。折坂忌行廂。鸞和不失音。仄徑皆康莊。楊朱定自悲。阮生徒慨慷。天路本無岐。可以恣游翔。行邁將何之。修塗浩漫漫。飄雲率已至。迅風振林端。前蹊既回惑。跬步阻川巒。有車不得馳。有馬徒盤桓。惟此涉世心。太行豈爲難。哲人鏡其機。夷險寓貞觀。枋榆笑斥鷃。瞻彼鳳與鸞。鳳鳥一覽德。能使雲路寬。何爲嗟岐路。投足未遑安。云誰頓八紘。振翮起飛翻。

柴墟懷古

岳武穆敗金人屯兵于此。有祠臨江。

金牌舊恨泣蛟綃。江岸荒祠尙寂寥。自昔河山征戰地。至今風雨鬼神朝。濤翻白馬東來急。天接黃龍北望遙。極目寒烟憑弔處。長虹中夜出雲霄。

孤山遠眺

振衣空翠裏。悵望水天隈。百谷秋濤壯。千帆夕照來。竹深山逕合。雲盡海門開。無限登臨意。憂時賦七哀。

一峰原砥柱。今日見桑田。

孤山原在江中。屬秦興今成平陸。爲驥江所有。

海嶠雲邊出。江城樹杪懸。葉飛孤岸雨。雁度萬家

煙。吳楚蒼茫裏。凭高思渺然。

脩篁月季

風影過長竿。花房玉露溥。美人脩竹裏。翠袖憶天寒。

岳武穆祠

禾黍金甌問古邱。孤臣戰迹至今留。荒碑尙記南朝恨。蔓草翻深異代愁。赤岸日高滄海色。碧天雲散大江流。千秋壯氣銷難盡。化作風濤遍十洲。

題口岸桃花圖

江天風霧綠濤寬。夾岸紅霞春未闌。若使此中無戰伐。桃花都作武陵看。

題枯楊細柳圖與吳商志

關山玉笛夜相催。那得春從輦路回。莫笑長條久搖落。拂天曾傍翠華來。無邊白草朔雲遮。落盡殘烟雪榦斜。多少玉門關上笛。不吹春色度龍沙。

紅白牡丹

二種牡丹。用北宋徐崇嗣法。

十二銅盤照夜遙。碧桃紗護洛城嬌。最憐興慶池邊影。一曲春風憶鳳簫。

季孚公爲甬東張氏演紫微新曲。卽張四逸園先公中丞遺事也。

樂府新聲唱紫微。中丞名節起人思。從今風月旗亭宴。爭唱清河絕妙詞。

盛德流聲歌舞中。抑揚今古羨詞鋒。擅場爾自推能手。袁李翻教在下風。謂籀菴笠翁也。

觀劇

鴛瓦霜明烏夜啼。玉簫高激鳳絃低。舞罷只疑看絳樹。絕纓還向醉中迷。  
宛轉餘音髮一絲。遏雲筵畔倒金卮。誰知暗墜長廊瓦。紅豆銷魂度曲時。

江城

秋風楊柳渡。馬首散秋聲。萬雉雲連水。三江雨洗兵。樓臺橫戰壘。簫鼓動嚴城。未見爰居下。波濤夜不驚。

聞砧

夜久砧偏急。風高聽漸稀。千聲霜欲下。萬樹葉驚飛。一作萬里。雁初飛。已應一作減別時帶。難裁去後衣。于今征戍近。無夢到金微。

題畫蓮

金池種碧蓮。蓮子誰當採。金粉不肯凋。豔色年年在。

渡江贈季希韓

結友浮大江。江聲蕩蒼昊。一嘯無潛鼉。千峰入汀艸。落葉隨孤帆。因風渡烟島。觀雲過吳洲。輕車出晴篠。脫鞅就嚴城。迴望驥江小。戒霜猶表葛。異地悅同好。含意操鳳絃。吾美信窈窕。薰帶時獻酬。相歡發奇抱。

仙人篇再贈季子

仙人騎鯨來。乃在瑤水湄。北溟旣揚塵。燭陰無光輝。五城如雲霞。我昔夢見之。采彼若木華。渺然見靈妃。還顧問青鳥。西母來何遲。赤松相對笑。桑海久塵移。魚翼垂大雲。天吳游相隨。蜃樓接飛鳥。擊鼓呼馮夷。閔風俄已至。萬象迴春姿。披我丹霞裳。瓊珮紛陸離。乘風揖羣后。千秋以爲期。

贈比部季子

還向家園看翠微。東山小草待春遲。最憐侍女熏香夜。猶憶青縑入直時。烟花九陌自朱輪。邊檄交馳赤羽頻。回首京華軒蓋裏。從容粉署是何人。朝吟爽氣坐抽毫。公事無關是馬曹。尙有舊含雞舌在。春風還待廣陵濤。握蘭當日羨仙郎。金屋千花覆石牀。鸚鵡聲中開別院。齊飛七十二鴛鴦。八關齋閣岫雲連。座客狂呼醉綺筵。莫使山靈驚夜鶴。且留風月臥平泉。柳外危橋山徑開。江潮暗度曲池隈。銅瓶曉向池邊汲。分得峨眉雪水來。愛客從知不爲名。座中結轡有王生。紅蓮初進雕胡飯。白玉還調薯蕷羹。客舍歌魚思黯然。相逢誰贈祖生鞭。尊前意氣爲君飲。脫帽高吟寶劍篇。玲瓏丹彩散天葩。刻畫爭傳沒骨花。欲使春風懷袖滿。齊紈先贈日南華。

季子有池亭在郭內  
江潮直至池中  
寓齋我紅蓮米  
羹薯蕷乳酪爲羹



擬游仙體贈吳商志

碧雲度蒼梧。知是帝鄉來。恍如雲中君。升降金銀臺。老聃御丹霞。松子乘奔雷。六龍導旌幢。羽蓋隨風迴。行上軒轅邱。排霞戲九垓。桃花將易世。朔野旣沈灰。高冠宴黃綺。笑滌舊尊壘。闕逢指攝提。陽氣方胚胎。虎豹嘯天關。霾霧猶未開。從君洗白榆。閭闔無纖埃。

仙人方六博。玉女戲投壺。一笑爍電光。下土無靈區。狹輪紛摩牙。中道逢騶虞。赤鳳鳴西崑。青鳥翔東隅。羣靈會瑤水。菴靄雲娥趨。驂螭上五城。謁帝受三符。滌嶂攀霞桑。弱水網珊瑚。蜉蝣玩其裳。朝菌行將枯。千春有朱草。可以象龍雛。手揮羲和鞭。何爲久躊躇。爲君激長颺。百谷駭天吳。安期納玉烏。王子吹笙竽。招我上丹梯。乘羽翔天衢。

古意贈友

我家吳山曲。君處大江涓。百里異風潮。脈脈動遙思。輕舟渡江渚。我馬欲何之。願言從所慕。繡綬新相知。錦衾旣前陳。佳人杳重闌。咫尺聞風雨。寤寐阻蘭期。念彼瓊樹枝。十日猶渴飢。何以致殷勤。宛轡惠前綏。結歡良不易。輾轉慎自持。一爲奏飛龍。心賞詎能違。

江城騁登望。滄洲浮雲起。青楓間紅栢。翕豔若桃李。勁風蕩千林。落葉蔽江水。金虎改迅商。坐見元陰徙。急景感歲闌。零雨遲東軌。手把芙蓉花。將以貽彼美。精誠無由達。悵悵不能已。四愁徒煩紆。同舟虛繡被。

屠狗在夷門。沈吟念公子。貢公不彈冠。千載無知己。惜哉延陵劍。三歎勞心理。大匠不運斤。榱桷同薪樗。王良不在御。神驥賤爲駑。和氏勿見剖。棄擲成砮矧。利器非蟠根。胡從知湛盧。所以處風埃。賢智盡爲愚。囚臣世所笑。鮑叔爲脂車。謀業須逮時。蓬累徒區區。呂梁何必險。側足在通都。曠觀鈞陶外。匪勉崇令譽。

高穹垂星芒。雞鳴耿長宵。窮陰尙流霰。春氣在寒條。黃鍾久希聲。舉世失簫韶。何由見鳳儀。期與帝相要。重輪轉羲馭。吹萬旋斗杓。陽林交丹翠。陰澗發蘭苕。騰蛇盤靄霧。鷹隼樂風颿。絕足未奔空。凡馬同銜鑣。絳螭一躩首。重雲開紫霄。

### 贈子長

赤岸仙槎想舊游。玉盤無那美人愁。從君一整滄洲轡。莫使江華滯蒯緱。醉月難過廿四橋。相憐客路把蘭苕。一時意氣傾千古。雙劍寒星動九霄。

墨雨千山洗螻蛄。江妃珠樹坐相呼。何心更擲閒邱壑。贈爾春風細柳圖。

時畫枯楊細柳圖相贈。

### 題畫梅用唐解元梅花詩韻

乙卯春。觀傅翁先生所藏唐解元梅花。真不啻天淵。與梅花自題古風。超逸清宕。視彼雕繪爲工者。其

寒姿瘦骨相映。偶在北堂。對臨元人墨梅。因憶六如詩句。依韻和之。戲題呈教。聊供拊掌。吟對梅花。足消煩暑。

素練誰剪三尺霜。墨華零亂開寒芳。蟠根古槎勢截嶠。繁鬚細蕊分毫芒。瘦骨傾欹皮半裂。慘澹窮崖飽

冰雪滿手瑤華萬嶺風。一聲玉笛千山月。凌寒獨立憐孤韻。美人不到羅浮信。何處曾分荀令香。幾時還插南威鬢。積墨成烟撲酒缸。吟詩自倒花間觴。藏名只合老空谷。高志直欲凌侯王。年年與爾同淒冷。醉聽鈞天天未醒。東閣看花漸白頭。梁園賦雪成俄頃。

畫水仙梅花再和唐解元韻

元陰閉壑交璇霜。有花破寒先衆芳。何人撞鐘擊土鼓。烟凝蕙草無寒芒。綠濤初見蛟冰裂。藐姑綽約真如雪。長帶應攜洛浦雲。南枝更照羅浮月。移情細聽琴中韻。攀條遠寄江南信。甘后偏依琢玉人。素娥不妒無雙鬢。擘州積雪貯玉缸。歌雲又進瑤池觴。華胥探簡呼聖子。水精吐書垂素王。惟有長卿四壁冷。憔悴江潭賦獨醒。月館三山望渺然。仙靈化鶴原俄頃。

贈筮在辛侍御

塵纓原與洞天違。物外相思隔翠微。肯以鹿車榮豸角。不妨蘿帶補朝衣。新詞黃絹題應滿。舊隱華陽詔許歸。自有江山千古在。好留風月付漁磯。

墨苑風流屬老成。白雲舊祕待先生。正平無地容疎放。北海猶慚問姓名。自辨銀鈎收蠶尾。尙留瑤草付龍耕。東來蠟屐窺松子。侍御有松子閣。如向青霞望五城。

臨劉棗魚藻圖

一聞江南管。再聽採菱謳。當時見兩槳。于此上蘭舟。

金波隨風瀉。一作綠瀉。窺荇帶。鷗鳥不能下。爲何觀濠人。誰是忘機者。

邗關守歲憶家君在江南

一水家山隔。樓棲客路塵。那知殘雪裏。今夜尙江濱。詩動鬼神泣。身同艸木鄰。高堂兒女宴。應念未歸人。金盡邗關路。長愁減客餐。星分孤館夜。酒散異鄉寒。簡點萊衣在。偏違杖履歡。避人霜下立。未忍對椒盤。忽見庭梅放。詩成捲敵笄。途窮驚歲改。親老畏年增。歷盡一行淚。春連半夜燈。彈冠坐明發。高譽望良朋。夢去依華髮。春難到故園。送迎人自老。新舊歲無痕。朔雪中原盡。鶯花九陌存。元陰莫留滯。青帝待朝暾。

丙辰春於揚州客舍贈稽田先生

極望雲霓天路分。幾時靈雨洗蘭薰。江虹海電都無準。膚寸惟看岱岳雲。先生將赴齊魯。天畔愁思金錯刀。忽傳青鳥下蘭皋。天吳尙有移山力。好待春江二月濤。先生待友江上。

軍中贈魯國崔生

起舞擊黃羊。邊歌繞帳房。箏聲催急雨。劍氣落寒霜。爾自攀新柳。誰能憶故鄉。雄心視江水。雪盡又春陽。勳名千載事。意氣片言傾。只有臨岐約。還深望遠情。魚龍春漲闊。蚌蛤夜潮驚。待我催游騎。江花早聽鶯。發春渡江于天寧洲軍中。和天一詩韻。兼懷張吳二子。兼示曹子素人。

乾坤兵氣合。草木不爲春。卻望沈舟處。何從問水濱。戈船明組練。笳鼓動江蘋。指顧鶯花裏。乘風待遠人。

酌酒與天一時在江干

戎幕

油幕對啣杯。風高畫角哀。醉中投石起。帳後鬪雞來。戰氣秦關合。春冰夢澤開。拔刀時擊柱。江岸一登臺。志學萬人敵。思深八陣圖。橫騎金勒馬。雙挽繡螭弧。草莽關星象。英雄在釣屠。于今稱水鏡。曾識臥龍無。  
于竹西客館贈越江應侯何子。

湖海身還健。元龍氣未除。山川能指掌。兵法不關書。志豈忘耕壠。人猶待後車。西游知有意。非爲食無魚。  
陶二心兌。有維揚之役。臨別索余筆墨。因作渡江圖相贈。圖成。夜將半矣。復作絕句三首書畫上。倘在江船坐倦。磕睡時。不妨索一二語和我也。

別時書札在秋前。到日西風落渚蓮。何事匆匆又分手。雨中還喚渡江船。  
桂華初向半園開。勝會難同對酒盃。夜坐東軒寫秋雨。江聲都自墨池來。  
十載棲棲一敝簷。長將秋水染谿藤。高吟未減江山興。我欲觀濤過廣陵。  
陶子招予同過半園。應唐士招飲。予以事不果。

秋江圖

烏目山人畫。遠水蒼茫。芙蓉釣艇出沒。煙柳盡亞。如聞風聲。

木葉澹澹水層波。葭汀落雁今始多。白雲斑斕不可把。瀟湘洞庭今如何。

菱塘魚藻

紅香春不隔。碧藻望如積。花潭千尺波。魚戲在半壁。

秋江垂釣

意不在魚。安用綸鉤。烟波無際。渺然孤舟。蘋花荻風。與之沈浮。共我睡者。其惟白鷗。

落花游魚

絳雪枝上落。明霞天際開。春風狼藉甚。捲過碧池來。

柳

誰捲珠簾望陌頭。三眠無復舊金溝。青門路上千條綠。半是春風半是愁。

雪後聞楊七虞玉陶二心兌渡江歸有贈

不肯寒山臥。還乘破浪風。藥囊貧未減。詩句老逾工。夜壑傷離鳳。霜天叫斷鴻。時楊子有西河之感。去年此日。正哭難兄亭。玉

也。生平盛意氣。感嘆欲書空。

襖被長爲客。風濤慎此身。歸纓分朔雪。別柳記初春。壯志青氈老。奇才白屋貧。年年渡江處。沙鳥識行人。

爲雲閒陳寓公贈雉臯石君

志士多苦心。不輕一飯恩。何況傾蓋閒。披襟如春溫。鄙夫重錢刀。失德愛盤飧。非無千金酬。誰能辨王孫。石子鬱奇抱。相感在片言。相感在片言。豈必乘華軒。嗟予久行役。投分思古歡。邂逅得楊子。遂與同朝昏。

予得楊子。如寓公得石生。密如平生親。意氣今所敦。緇衣有同好。此義今誰論。公子去久矣。千載無  
寓公報之以言。予愧之矣。夷門三歎念斯人。庶幾風尚存。

雙檜圖歌贈姚子

噫嗟闕里之檜無旁枝。大塊靈氣繚繞之。觀其萌芽占歷數。一葉先告開昌期。我不能游曲阜。撫靈柯。玩  
此離奇。將問真宰。何爲使爾寂寂沉冥而無所知。今也何時。冰雪摧傷上林柳。舉首不見扶桑暉。何處深  
崖雙古榦。上聳虬枝拂河漢。堅貞自養冰雪姿。傲兀不爲耳目玩。九僊羣鸞來游翔。天雞鷄旦音相亂。烟  
苗豈與四時異。標致遂與凡卉判。曉雨百泉根底鳴。暮雲千嶺枝邊斷。望舒弭節霜條上。羲和迴鞭翠微  
半。誰營鳩鵲觀。誰構柏梁臺。班倕那肯顧。梓人空徘徊。斗筭睨視不相賞。大器濩落成凡才。對之感慨有  
姚子。愛吟但看西山紫。醉呼李生畫雙檜。生平寄託真如此。畫筆蒼茫吾與爾。興酣五嶽驅一指。直瀉銀  
河三百丈。墨雨淋漓正相似。牙角紛拏碧雲裏。上攀猿猱下鬱壘。倒挂懸崖兩赤龍。青天雷雨圖中起。

題燕人王筠侶畫小鳥立霜枝紅葉鮮潔可愛扇爲蛟門舍人所得

不將螺黛染烟嵐。醉染霜枝興正酣。燕市紅塵藏不得。故留殘墨到江南。  
還想含毫供奉年。消魂紈扇墨痕鮮。枝頭莫是啼鵲血。葉點殘紅絕可憐。  
梳翎小鳥愛霜苔。山果無名扇底開。立斷高枝不飛去。風前銜恨爲誰來。

畫手曾高北地聲。誰從墨苑重狂生。得錢但買倡樓醉。不許王侯識姓名。

水晶簾畔度羅裙。筠侶遺事。詳汪舍人傳中。勝事重題藻筆新。那知身後逢知己。猶有風流汪舍人。

### 江山圖

白雲迷漫江北雨。波面金焦在深霧。江南山影知何處。風帆只一縷。欲渡不得渡。蹴天浪拍城頭檣。鯉魚風起江豚舞。瓜步笛步吞復吐。直待馮夷來擊鼓。乘風再過江南浦。

### 送孫無言歸黃山

大隱不在山。山無碧雲住。渺然乘虛舟。飄緲望烟路。將謝區中轡。未曠塵外屨。翠微在襟帶。眞想隔風霧。肯令蕙帳空。春徂復秋暮。龍松千虬枝。斷崖滴陰露。四時作風濤。杳冥神靈雨。其下吼清川。上有笙鶴度。松陰冷舊閣。青荔虛隱處。誰採金澗芝。寂寞巖潭趣。雲海想沐髮。猿鳥待一顧。激棹入桃林。花源恐迷誤。馨聞招同鐵佛寺看梅。諸子皆先往。予不及偕游。獨步至北郭梅林下。悵望久之。

觀樂度閒宵。旌門罷歡宴。夜同吳子觀樂。朝赴看梅之期。蘭友折柬來。相呼及羣彥。仲月梅始繁。蕭辰共游衍。予

從城東闔。嘯侶上芳甸。何意爽虞期。春岡誤登踐。遵塗迷往轍。幽尋乃余先。遂阻風中轡。不共花下饌。迴策度北林。蒼茫送遙盼。羣鳥起寒蕪。山鐘隱峭嶠。懸知高歌處。花覆青苔遍。藉艸鳴清絲。醉哦脫纓弁。烟路折花歸。餘香滿羅薦。



春曉北林下望梅花

新烟變春社。游子仍異國。華春猶未半。原草盡碧色。寒香動千林。始識東風力。陵苕已堪把。花氣翔蜂食。新賞獨後期。春思渺何極。

秋客蕪城臥疴僧寮寄贈穆倩無言扶辰蛟門彥度師六二瞻舟次諸子

秋蟲日夜急。秋草傷客心。窺窗見白雲。靄然生晝陰。涼葉上虛枕。離懷蔽青林。垂帷悵所思。如隔邱與岑。惟君鼓銀簧。蘭氣盈空襟。流連風前酌。遂啓囊中琴。飛龍調既合。敢惜絃上音。傾賞惟古歡。對之復沈吟。絃匏無異音。椒薰悅同馥。古有錦繡段。將貽美人服。何以致繾綣。採芳日盈掬。論交各有因。囂塵世相逐。軒蓋徒喧脞。車音杳空谷。所以結賞心。寤寐予杼軸。

柳庭秋易寒。薜荔自結束。歌停竹西屐。烟斷雷塘綠。臥疴凜風帷。檢身如枯木。須臾冰霜至。炮烙又見毒。渾沌同晝處。金莖想夜沐。鍊藥鮮芝朮。侘歎頻仰屋。九食思古人。日晡一糜粥。丹彩誰見珍。嶽雲那堪鬻。憑虛吾氣在。長嘯動簷竹。羈孤戀良朋。何爲自局蹙。好我豈徒然。清塵欣在矚。披衣不及帶。凝睇佇來告。

贈顧若思

顧子若思。性磊落。好古。美遊遊。喜方術。能以爐鼎煉草木花果。皆成天露。以治療百病。雖沈疴。投之立起。久服可以扶衰引年。蓋藥露之妙。去

滓垢而取精華。則通靈而無滯。此用之之所以神也。余與顧子相遇于婁東。一見契合。他時入山煉藥。將呼顧子爲采真之游。顧子其勿忘余言哉。

海岳閒身物外期。參靈曾得至人師。蒸花煉草成仙露。轉笑神農未得知。

神人用藥不用藥。藥有精華用不同。誰知至妙傳金鼎。一滴能分造化功。  
藥鼎氤氳生紫烟。抽添火候自天然。金莖玉露尋常有。不許銅人憶漢年。  
大藥原從簡易求。先天靈氣此中收。直教老病從今減。爲爾新添海屋籌。  
卻病何須三秀草。引年不借九還丹。人間無地堪棲隱。只有壺中日月寬。  
詩囊長伴白雲閒。天與神漿可鑄顏。他日呼君同採藥。結茅終擬入名山。

江路桃花

于江春色裏。萬樹自無言。于今江上路。處處是仙源。  
瑤水應無路。綏山那可游。千林醉絲管。花月古揚州。

題在湄畫

紅雲天半護瑤臺。並舞黃鵝紫鳳來。始信毫端通造化。秋英春豔一時開。  
寶玦光華碾帝青。美人微醉倚雲屏。翠翹金縷葳蕤鎖。更剪瑤天白鳳翎。  
柏石忘憂

雲壁隱仙家。琅玕起翠霞。赤虬蟠柏葉。金鳳舞萱花。

梅

古梅如高士。堅貞骨不媚。一年一小劫。春風醒其睡。

江帆圖

雀舫驂騑別路分。千林花落恨離羣。渡江過盡春山路。迴望長洲變夏雲。

# 甌香館集卷五

## 邗上遇子子伊聲有贈

邗關霽寒雨。之子渡江來。道旁忽相呼。對我懷抱開。新烟動隋柳。殘雪散江梅。爲君發枯桐。春風淒鳳媒。我車不能馳。日暮尙風埃。悲歌復行歎。碧雲空徘徊。角巾爲予留。屐齒鳴霜苔。樂此賞心晤。瑤席同深杯。隔秋放烟艇。落葉君始去。遲君青楓林。獨立竹西路。美人抱孤篴。渺然隔雲霧。空遺瑤華音。歲晚不得遇。風雪滿寒江。周流子未渡。緹馬阻高邱。轉爲靈脩誤。黃鶴念舊巢。去去復返顧。夜月期湘靈。春花下瑤圃。相與採紅蘭。芳洲送游屨。

## 十四叔父自七閩還吳。相見狂喜。兼聞近事。感歎有作。

梨關兵合斷重圍。海角音書鴈到稀。短夢易從殘夜醒。故園難自異鄉歸。七盤鳥道收高壘。百戰狼烟護衲衣。白髮相歡諸父健。家山重問舊青薇。生還如在玉門來。客路傷心徧草萊。血雨重城雞犬盡。黃埃千帳馬駝迴。猶傳填海留精衛。又見昆池走劫灰。從此雄關休設險。蠶叢終爲五丁開。初疑百谷飲長鯨。俄頃桑田已變更。馬角未生期尙遠。雞人無力夜難明。潛身木末看傳箭。變服蘆中急

避兵世事漫勞親故問。且將尊酒話平生。

庸蜀經營事已闌。占星空向斗牛看。躡珠肯入平原館。短髮徒衝壯士冠。曾見梨關三度馬。誰封函谷一泥丸。傷心國破爲俘日。賦就招魂淚未乾。

戊子之際。予與仲兒同嬰建寧之難。

零雨三年獨苦辛。暫開天險送歸人。身同黃石思求侶。客有青囊不畏貧。乍見籃輿回粟里。肯教神劍阻延津。最憐弱弟真狂喜。手解征裘洗戰塵。

月夜從愚菴大師陳際叔徐世臣湖干閒步

披衣攬夜色。遂適湖干趾。喧籟息近聽。林巒斂遙視。千峰寒月中。萬壑疎鐘裏。遠火互明滅。鮮霞間青紫。三潭弄浮烟。因風蕩爲水。浮汀漁唱入。過浦簫聲起。星河窺荇藻。雲影亂屣屣。佳遊領支公。雅調及高士。霜月滿歸塗。宵深情未已。

獨清圖

花從殘歲密。香帶暮烟生。不作繁華想。增余冰雪心。

送滕子還閩

滕子閩人。自閩入燕。沈身絕域者九年。後其妹致書蘇門。物色得之。知老母尚在。遂以計脫。閉關南還。

別淚春風染杜鵑。驪歌聲斷綠楊烟。身沈絕塞思千里。心死穹廬客九年。吳苑離觴寒食後。梨關歸夢落花前。閩南別去能相憶。倘有雙魚海上傳。

春城戰血冷，悲笳廢壘傷。心舊礮車雪，客生還猶有母。玉門歸去已無家，同騎塞馬眠燕月。獨向河源上漢槎。我有離魂招未得，劫灰天畔哭黃華。予與仲兄相失於黃華山下。

曉起

連夜深山雨，春光應未多。曉看洲上艸，綠到洞庭波。

遠眺

暮雲千里亂吳峰，落葉微聞遠寺鐘。目盡長江秋草外，美人何處采芙蓉。

西堂桂樹下

危榦帶雲青，落英吹地白。不忍見蒼苔，樹下留行迹。寂寞行空臺，攀條向花哭。不見白髮人，花閒倚筇竹。麻衣秋更冷，香氣曉侵膚。無盡號天淚，應教桂樹枯。

題畫

十年我夢在滄洲，眼底湘雲足臥遊。碧雨聲中橫翠岫，墨痕斷處是江流。

深林秋靄圖

落葉空林起翠烟，此中日月欲無年。清暉坐看霜豪滿，不待移情聽五絃。

題畫櫻桃

白晝華星照綠苔。千枝爭放火齊開。于今合浦徵求盡。照乘翻從筆底來。

玉山園池與石谷聚首。三月九日暫歸虞山。復來相聚。風雨愆期。故有此作。

插茱時節君偏去。手挽詩囊不肯住。與誰吟眺登玉山。紅柏青楓望歸路。相期五日刺船來。濕雲忽斷千  
邨樹。風狂雨昏舟不前。前灘後港沈荒烟。雨聲夜急浪潑舷。推篷茫茫不見天。今宵泊舟何處眠。

題山堂讀易圖

霜毫落處開丹嶂。瑤風墨雨呼靈匠。半壁長看五嶽雲。何須九節盧敖杖。  
薜荔清暉生研席。懸帷坐對西山碧。松風不斷夏長寒。竹雨聲中展周易。  
桃花何必秦時鳥。此中風月應常好。怪他還著古衣冠。松閒笑指商山皓。  
瀑泉清籟蒼高吟。掩卷深知靜者心。衣上卻疑嵐翠滴。滿堂山色坐彈琴。  
閒呼猿鶴伴山堂。蟬蠹縹緗擁石牀。自向杯中留日月。莫從人外問滄桑。  
採藥何曾問十洲。八千誰復記春秋。靜中得意探河洛。不許仙人賦五游。

再題山堂讀易圖

一聲黃鳥過殘春。何處紅絃落鳳塵。凌霄花發青藤密。坐憶山窗讀易人。

蓮

綠雲飄縵動僊裳。紅豔輕勻鬪曉妝。閒向花房摘蓮子。滿衣金粉露華香。

題蒼虬石壁圖爲友人壽

樛枝勢夭矯。忽欲蟠擎空。又如驚螭走。默與奔雲逢。端然君子身。直立撐鴻濛。終南與青都。烟雨遙相通。

靈風

靈風研席舞春煙。刷黛含丹色倍妍。借得天工長在手。一枝開過送春年。

題山水

天吳起研北。雲嵐恣吞吐。風雨若移山。真疑鬼神怒。

桂

天香玉露清。丹藥杵無聲。高處應難翦。枝猶蔽月明。

題石谷陡壑密林圖

連峰逼天起。花潭下澄碧。蒼茫神靈雨。冷風動松柏。忽見鴻濛開。居然造化設。新賞入奇懷。清暉應未隔。

虎林書至因寄李子

烟棹期春過。冰霜已歲寒。最憐今夜月。仍在故鄉看。漸短荆卿髮。徒存子夏冠。殷勤故人札。千里問加餐。



祝潔菴先生詩

潔菴圖。爲潔菴高士唐先生畫。并佐綵庭之觴。潔菴先生。以潔名菴。一邱。名其所不能名。而以發其隱約。寓其深思。諦視斯境。一草一樹。一邱。一壑。皆潔菴靈想之所獨闢。總非人間所有。其意象在六合之表。榮落不四時。外將以尻輪神馬。御冷風以游無窮。真所謂藐姑射之山。汾水之陽。塵垢糠粃。粹約冰雪。時俗齷齪。又何能知潔菴游心之所哉。圖成。賦詩九章。索同人和之。

潔菴離塵想。高步青冥間。龍馬身從健。海鷗心與閒。誰知此中意。爲我問西山。昔時騰英聲。忽見歲月改。慨然遺華纓。孤游本無待。寤寐思古人。魯連在東海。如聞蘇門嘯。誰同柳下鍛。舉首叫虞淵。重雲蔽河漢。無酒且高眠。遙夜不可旦。桑扈羸行處。放歌天地寬。興來倒曳屣。客至忘其冠。續毛從吾好。採藿從所安。美人停鳳絃。遲暮悲芳草。折彼瓊樹枝。所思在遠道。空有瑤華音。不見三青鳥。好鳥啼青谿。谿光上蘿屋。中有遐思人。鶴鳴杳空谷。天籟奏鏞鼗。其聲在松竹。仙人愛弈博。列炬芙蓉城。麟脯錯瑤盤。煉藥飯黃精。一笑髻再綠。滄海已塵生。騖螭望太華。息足瑤芝圃。雲將方雀躍。關此林潭趣。不許問津人。知我桃花路。潔菴何所有。珠樹千萬枝。其上棲玉鸞。其下挺華芝。拊手招松喬。千秋以爲期。

春游雜詠

采香涇上雨如絲。蕭寺春深人未知。霧滿空山啼百舌。春風已過杏花枝。

翠削芙蓉石作城。雨華金地與雲平。我來不是春游客。手自磨崖記姓名。  
樹暗深烟鳥語頻。谿山偏作亂離春。好風吹綠吳宮艸。惱亂江南賦恨人。  
嬌風淫雨傍花多。翡翠城空春又過。我已無心看芳艸。不將閒淚灑銅駝。  
碧苑紅樓聽早鶯。年年春向客愁生。花邊得句無人問。直上琴臺發嘯聲。  
館娃宮柳冷侵魂。風度蘆笙過洞門。花裏一聲河滿子。紅梨煙月又黃昏。  
叢竹浮烟上海棠。紫崖啣日斷雲黃。吟詩樹下驚山鬼。狼藉鶯花一錦囊。  
二月平湖生綠波。亂山吹雨暗青莎。登樓不忍看楊柳。吟客春愁病後多。  
羅縠香風苑路新。可憐無地起游塵。鶯花醉殺癡兒女。曳翠拋紅又一春。  
草深騶馬正驕嘶。橫過花林落燕泥。欲縱金丸轉青陌。綠楊枝上打黃鸝。  
青帘白舫度笙簫。油壁香車出畫橋。笑殺春風豔羅綺。不知紅紫爲誰嬌。  
三春襟被不窺園。車轍何曾到席門。不遇侯嬴人漸老。鼓刀寧負信陵恩。  
杜若新愁黯未開。煙花春盡獨登臺。賦成鸚鵡何妨死。千載無人解愛才。

和枚吉大雪齋中觀劇

獨醒偏愛雪。不共玳筵歡。影帶歌塵落。花憐舞袖寒。幽蘭方促柱。黃竹故留竿。自笑先生履。孤吟立夜闌。

贈愚菴三宜和尚

遠公精舍傍湖曲。石廊交映梧桐綠。迴樓每見朝雲宿。深池時有鷓鴣浴。高臥湖山不計年。袈裟常伴六橋煙。六橋花柳繁管絃。月明夜放蘇隄船。煙光泊得閒中賞。隨波弄月滄浪上。簫鼓無聲星斗稀。中流一嘯千山響。師每遇月夜必泛舟出遊竟夕忘返壁立高風聳奇峭。襟期磊落天下少。對弈松閒喚狗屠。忘情谿上馴鷗鳥。逢場竿木全機露。正眼分明青草渡。佯狂敝屣法王尊。白髮婆娑煙水人。乘興且騎支遁馬。論交更結東林社。挖揚風雅寓獅絃。郢調諸方稱作者。黃金如意玉連環。風散天花寶座間。談經夜壑魚龍聽。禪定空山虎豹看。十年耿耿魯連節。伯牙流水無人識。煨芋何妨折脚鐺。縛身自有三條篋。我來十月西陵道。繁霜凍斷蘇堤草。同調淒涼風雨愁。三秋寤寐重傾倒。一曲陽關那忍別。驪駒歸路衝冰雪。空吟紈扇碧雲詩。虛對相思元度月。儻問何時再過從。綠楊黃鳥啼春風。

送許傅舟北上

許郎五月絳綃輕。赤烏鍊石將北征。門前錦鞦班馬鳴。南風吹滿毗陵城。螻螻聲殘讀書屋。紅亭西去垂楊綠。六橋烟月看未足。畫船又指黃河曲。前度雲亭把臂時。錦囊自製驚人詩。同遊楊子亦奇麗。連珠合璧光陸離。往路雙鷗弄烟水。載筆高吟碧波裏。桂櫂吳謳五兩風。蘋花蓼葉三千里。一別胡姬春酒樓。重過燕市又逢秋。自將綠酒掛金碗。手解紅韁上紫騮。九陌三條芳艸歇。氈帳琵琶彈夜月。醉倚甃甃脫麪

袍。卻指觚棱望天闕。四姓侯家甲第雄。豪華舊與金張同。況有西臺御史驄。炎天白簡生霜風。吾子翩翩擅文藻。五陵裘馬非其好。一言深感俠士心。輕薄紛紛何足道。三疊歌成送別離。吳雲極目長天涯。美人若有瑤華贈。屈指秋風雁到時。

春晏高雲樓聽阮郎歌。雲卿索詩贈之。

曲房搖波嫩如月。龍腦香微熏畫壁。挾彈相過游冶兒。調笑倡樓醉青陌。花間起舞拂蘭纓。笑倚西窗雲母屏。繡袋織成鴻鵠樣。碧簫吹落鳳凰聲。猗頓鴟夷如敝屣。三語辟掾亦偶爾。一聲紅豆慣消魂。檀槽自激梁塵起。時斟平樂酒。看殺杜陵花。蒹葭漫相倚。誰共雒陽車。子都安陵豈足羨。紗帷春暖湖山宴。桃花洞口阮郎歸。嫣然笑認仙人面。

雙鸚鵡

綠衣相對畫廊深。那比雌雄共一林。同夢可曾歸隴樹。呼名爭擬變吳音。梳翎不妒簾櫳影。並舞難忘霄漢心。只爲無雙稱賦手。芳洲留恨到如今。

筆牀

脫穎何須問處囊。倦吟收得兔毫芒。雖非文苑輪囷木。卻帶騷人翰墨香。盡日不離青玉案。閒時長臥綠沈槍。卽看灑翰驚風雨。應有蛟龍起半牀。

題髯公松下抱孫像

藹然褒衣人。灑灑出塵表。心如滄洲雲。貌比商山皓。置君邱壑中。雲氣更深杳。虬松落空翠。花石相繚繞。自有琅玕飯。能使顏色好。掀髯吟松風。雙眼送歸鳥。一孫著膝前。一孫手中抱。皎皎兩鸞雛。勢欲摩蒼昊。養成凌雲翮。坐見飛騰早。對此且行樂。花閒置清醪。酣歌兼六博。那惜玉山倒。醉鄉無昏朝。俯仰乾坤小。自古有糟邱。天外無仙島。

落葉無聲圖

落葉無聲秋影空。碧雲吹墮半巖風。吟詩夢入紅林路。展卷身疑在夢中。

番王金璽歌

虎林友人。曾從都門重譯。辨西番金璽文。不受官而歸。著書論鍾鼎古文。

番王使獻金璽。懸千金。莫能視。君縱觀得其理。重譯何侏僂。蟲書竟奚指。玉環既解驚廷臣。□□錯亂非觀美。身披紅雲上豹尾。摩挲銅狄宮門裏。一雙赤管伴險麋。壯心聊展雕蟲技。相如爲郎亦不屑。致身何用儀秦舌。簪筆曾哦上苑花。鬪裘還點燕山雪。卣鼎久剝蝕。盤盂無鳥跡。箕子想沈碑。延陵亦崩坼。洗簡參籀書。披圖考金石。龜文象其巧。龍鱗想其畫。嶧山與之罍。顛倒正非昔。六書旣亂無前文。應使秦斯按三尺。天亦不雨粟。鬼亦不夜哭。芝英雲氣改松鉛。鸞鷲勢已非蒲竹。鴻都觀碣空十尋。縱翻科斗誰能讀。古文零落辨秦餘。神明書體惟君獨。還如汲冢見周書。因君一洗千秋目。

題東峽畫扇

如在懸厓半嶺看，密陰深翠覆闌干。古藤上與浮雲結，白日長令澗戶寒。

畫荷葉

衝泥抽柄曲，貼水鑄錢肥。莫破秋風綠，將裁處士衣。

澹遠堂話舊

落盡閒庭樹，高吟過一秋。花中銷醉夢，詩裏換征裘。客與歸鴻散，琴添別鶴愁。重來風雨夜，慷慨話藏舟。把酒共論詩，虛堂笑語時。雲昏秋夜雨，鳥隱夜深枝。風籟爭窗紙，燈花落研池。他時思此夕，重與故人期。

秋風驪駒吟

秋星高，秋雲黃，天露零草，烟灘鳴蜩，瑟風驪駒，夕照河梁，手傾龍膏，進子羽觴，雲錦五花驄，芙蓉千金裝。吹參差兮風裊裊，漲江淮之波兮，中洲如島，地盡吳楚，天接雲鳥，瀟瀟江汀，落雁何多，樓船簫鼓，隨風揚波。君之行兮鳴玉珂，我獨立兮山之阿，悄予望兮雲嵯峨，雲嵯峨兮渺吳關，抽余思兮在禹山。

過鴛水，遲持平師不至，賦此留別

梅花落遍西谿白，浪遊同作錢唐客。梅花時，與師  
邂逅西冷。中冷橋邊分手時，新烟未動垂楊枝。我去當湖湖

水曲，蘼蕪已作瀟湘綠，芳陌殷紅染杜鵑。孤篷鴛水再停船，金錫無聲凝暮靄。寥寥空與碧雲待，客久江

山賦倦遊。回轡路上百花洲。

余將歸里。

翻愁兩漿苕溪渡。寒雨衝波不知處。

師去苕溪未返。

黃鶴西飛獨未

歸。故園雲樹空依依。漫指江南舊阡陌。青鞋自踏梨關月。誰道春風不出關。閩山吹夢到吳山。折梅曾見

花前別。歲歲花時兩相憶。

師結茅芝城山中。三十年矣。訪舊出關。欲歸毗陵書墓。

已不果行。復決策還閩。

和西爽齋詩

散帙林堂上。悠然生遠心。縹緗蟬蠹跡。蒼翠石庭陰。水鳥窺朝幌。風花拂夜琴。友聲騷雅合。高興寄西岑。

送孫大遊天台因憶國清長老

問訊彌天客。三年一字無。山空芳杜冷。人遠碧雲孤。半偈分婆竭。千花散鷓鴣。非君厭蘿薜。歸夢滿蘼蕪。

和次谷贈九日韻

學詩十年用我法。那肯隨人並肩胛。滌腸曾用金莖嚼。醫俗須將墨汁呷。笑殺折楊衝口出。直似比鄰惱鵝鴨。但見陰陵頻失道。何曾七札能穿甲。兩公詩壘鋒莫當。囊鞭旗鼓誰能狎。余方苦吟一字無。忍以秋蛇汚君筮。清風冷然對許詢。潑墨何能擬王洽。與君論詩爽心目。猶如背癢麻姑搯。絕調還留中散琴。埋愁不借劉伶鍤。有時與酣同門勝。雄談如倒瞿唐峽。高歌石上臥紅氍。爛醉花閒墜白恰。對吟聲欲撼窗樞。燭光香氣噴簾押。奇句忽成天險關。驚人定把先賢壓。盡力篙撐急水灘。抽思雨灑迴風雲。東方詰曲幾窮哉。蘇君再發陰符匣。

秋宵曲

和次谷韻  
用香奩體·戲

思歸縮地全無法。夜聳吟肩寒透胛。茂陵渴殺病相如。一杯空想芙蓉呷。只憶寒宵畫閣眠。沈香被冷熏金鴨。斑管長蛾染黛螺。紅箏纖指調銀甲。惱公原是令公喜。憐卿那許將卿狎。新妝小婦盤龍髻。撲螢笑展風前箑。如鉤月下捉迷藏。合昏花底成歡洽。怨別牽衣宛轉啼。纖痕臂上猶存掐。誰知帶水阻銀河。竟滯梁鴻廡下鍤。解珮何心繫漢臯。爲雲枉自留巫峽。去日流黃懶上機。歸時漉酒惟存帖。身似蒼鷹新脫鐵。興如吼虎初離柙。匱底欣開粉黛色。斂梁笑把搔頭壓。但教紉草是宜男。那用迴文成一霎。此夜刀頭望葦砧。明朝鸞鏡開鈿匣。

題獵犬圖

只傍鷹師獵騎邊。圍場淺草每爭先。中山東郭搜羅盡。可許閒階自在眠。仰看婁宿在天隅。枉說非熊載後車。莫以功名輕狗監。也曾稱賦薦相如。

杪春寄逸園商志

美人卷瑤席。遙渡若邪谿。春風來自東。海雲都向西。予同結遐想。寤寐乘紫霓。故游尋花源。靈境懼先迷。羣僊吸鵝管。上下翔天雞。晞髮待朝陽。因之凌丹梯。

畫小園半壁



峭舊初疑嶺路通。鳩鵲白鷺夜翔風。過牆千尺松篁影。人臥蒼茫空翠中。

新春十日小雨。過馮生飲。坐客爲莫大馮季諸君子。

春來十日雨濛濛。春光初轉芳蘭叢。昨宵月照春城畔。今到官街泥沒骭。吳客蹒跚著屐來。開樽自卷青絲幔。大馮豪宕舊交歡。當筵馳辨如風湍。有時短髮怒衝冠。小馮滑稽不可止。解紛慣射遼城矢。眼中惟我與君爾。莫子瞋目脫接羅。袖中常把錯金椎。感恩肝膽知向誰。太公慷慨不舉酒。欲醉筵前雙玉斗。主人奉觥起稱壽。胸中轆轤復何有。憚生捫蝨黑貂裘。酒酣長笑欲上城南樓。人生得志何必萬戶侯。但令白日不墮天西頭。常與三子高歌爛醉沙棠舟。稻梁黃鶴安足謀。芝田欲盡吾奚憂。今日燈前君對舞。明日驅車向何所。鐵笛春風滿戰場。梅花散作山城雨。馬蹄塵起黃雲暮。杜宇聲哀白門路。白門楊柳正愁人。莫挂春帆渡江去。

送馮子

春雲片片著花枝。江城柳暗黃金絲。征車在門班馬嘶。草青南浦生別離。連宵酌君酒。絃琴常在手。一聲哀怨操離鷺。月華忽墮庭前柳。昨夜爲君歌。燈前翦紈素。宛轉歌不成。徘徊念君故。橋邊醉挽金絡頭。留君青驪不肯住。蹀躞上芳洲。行帳春星曉。卻望吳雲隔亂山。江蘿吟風波渺渺。衣染秦淮渡口霜。馬銜白鷺洲邊草。正月鶯聲少。二月鶯聲好。三月鶯亂啼。春雲去如掃。仲宣樓頭花欲飛。歸來長鋏應須早。

登吳山

路入前峰近。青蘿望可攀。豈知身到嶺。忽失眼中山。嵐翠人烟裏。車塵雲霧間。憑高見天盡。無地辨吳關。吳越相依處。蒼烟靨黠中。半江晴變雨。衆鳥夜呼風。帆落青天小。雲來碧樹空。最憐樵牧地。荒草是遺宮。

贈徐徽之

青山曾與赤松期。又見鶻啼故國時。三月鶯花江上客。十年風雨夢中思。扶桑黯淡鮫人泣。薜荔凋殘山鬼知。老驥肯忘千里志。唾壺歌斷鬢邊絲。

贈莊太史澹菴納姬

不戀金華侍從班。明珠何惜換紅顏。自將五色雕龍管。坐倚芙蓉畫遠山。茂陵車馬看花心。鳳曲渾忘舊玉琴。聞道閨中初製錦。書來先寄白頭吟。綠酒同斟鸚鵡盃。絳綃人在避風臺。生憐客館非金屋。亦放蓮花貼地來。黃鸝百轉上花枝。霜簟微風過曲池。不捲重帷知夜短。楚雲遮斷夢來遲。

紫塞

紫塞吹笳人未還。春花落盡穆陵關。鷓鴣不管興亡恨。只向簾前喚故山。

畫雪山爲周聖濤起病

松火敲冰心暫閒。擁衾行藥地爐間。避風不捲青絲幔。坐隱烏皮看雪山。

曉發新豐。將至京口。和青巖韻。

篷窗天欲曙。急溜響鄰舟。雨尙啼沙鶉。雲還閉斗牛。潮聲到虛枕。山勢入他州。遙想空濛處。鏡喧古渡頭。

題流觴曲水圖

禊飲永和春。風花曲水情。激湍喧几席。靈籟響軒楹。忽見翠微落。虛疑浦澈明。琅玕搖竹色。偃蓋動松聲。盤石窺人冷。深煙拂練輕。繁華正三月。文藻萃羣英。宛爾吟初得。欣然句自驚。卷書隨臥起。載筆澹經營。草暖香承坐。觴浮綠未傾。花茵紛綺麗。冠珮自崢嶸。隔岸懸丹閣。臨谿挂翠屏。羣鵝還帶荇。密樹不聞鶯。想象蘭亭跡。風流晉代名。天機發靈賞。妙繪送餘清。逸興邱樊合。幽襟草木并。細看蘿磴裏。時有白雲生。

